

1 Corintios

Pablo Goãmũ yarãre Corinto majarãre gojabeõnumi

¹⁻² Yũhũ Pablo, Jesucristo yare ãgũ buhedore apidigũ ãhraa. Goãmũ ãgũ gamero dopa ta Jesu ãgũ apibure yũre beyerũ ãgũ. Sostene Jesu yagũ mari acaweregũ mera mũare Goãmũ yarãre Corinto majarãre gojabeoa gũa. Jesucristo mera majarã mũa árĩcũ Goãmũ yarã árĩmorãre beye aĩdi árĩmi Jesucristo mũare. Eropirã árĩpehrero majarã gajirã mari Opũ Jesucristore serẽrã árĩrã, erã sã Goãmũ yarã ta ãhrima. Jesucristopũ erã opũ mari Opũ sã ãhrimi. ³ Eropirã Goãmũ mari Pagũ, mari Opũ Jesucristo mera mũare õadoreã. ãgũ itamuri mera õaro árĩque mũa.

Jesucristopũ mũare õaro iibasadigũ árĩmi Goãmũre, arĩ gojañumi Pablo

⁴ Jesucristo mũare õaro iibasadigũ árĩmi Goãmũre. ãgũ eropa iicũ ãagũ, Goãmũre yũ mahigure, Õhaa," arãa yũhũ mũuri nũcũ. ⁵ Cristo yarã mũa árĩcũ ãagũ Goãmũpũ mũare õaro árĩcũ iimi. Eropigũ ãgũpũ ãgũ yare mũare gajirãre weremorãre iimi ãgũ. Eropigũ ãgũ, ãgũ yare õaro masicũ iimi mũare. ⁶ "Cristo mũare õaro iigũcumĩ," mũare gũa arĩ werediro ta wahabũ mũare Cristo yarã mũa wacũ. ⁷ Eropigũ árĩpehreri ãgũ ya árĩburire mũa iimasicũ iimi Goãmũ mũare. Eropiro ne dũhyabeãã mũare.

Mari Opu Jesucristo i yebague ĩgu dujariborore mua corerisubu Goãmuru muare eropa itamuniguicãgucumi. ⁸ Eropigu Jesucristoru mua ĩgure umupeoniguicũ iigu añhrimi. ĩgu eropa arĩgu arĩcũ muru i umu pehrecũ mua ñeri iira dipuwaja moorã arĩcũ iigucumi. ⁹ Goãmu “Ōpa iigura,” ĩgu arĩdiro dopa ta ĩgu iimi. Eropigu ĩgu, ĩgu magu mari Opu Jesucristo mera yujuro mera arĩmorãre marire beyedi arĩmi.

Jesu yarã Corinto majarã erã game dũca warirare Pablo arĩ gojañumi

¹⁰ Yu acawererã, mari Opu Jesucristo ĩgu dorero mera muare burigã serẽbu iiaa: Mua basi game dũyasobiricãque. Eropirã mua basi game dũca waribiricãro gahmea. Yuju curu ta arĩque mua. Eropirã yujuropa ta õaro arĩniguicãque. Eropa iirã mua iiburire pepirã, yujuropa iique mua. ¹¹ Yu acawererã, mua basi game dũyasorã iayoro mua. Eropa arĩ wereama Cloé ya wihi majarã yure. ¹² Gajirã mua mera majarã õpa arãnorã: “Pablo ya curu majarã añhraa gu,” arĩ wereniguiayoro gajirã mua. Eropirã gajirã “Apolo ya curu majarã añhraa gu,” arãyoro gajirã. Eropirã gajirãpũ daja, “Pedro ya curu majarã añhraa gu,” arãyoro mua. Eropirã gajirãpũ daja, “Gu tamera Cristo ya curu majarã añhraa gu,” arãyoro mua. ¹³ Mua eropa arĩquerecũ ta yũhũ õpa werea muare: Cristo ya curu majarã yuju curu ta añhraa mari. Eropirã mari basi yujurãyeri dũca warimasibea mari. Yuju curu ta arĩrã iiaa mari. Yũhũ Cristo arĩbea. ĩgu iidiro dopa mua ya dipuwajare crusague sĩridigu

árĩbeaa. Eropigũ mũare gajigũ waĩyegũ yaha waĩ mera waĩyebeami. Cristo ya waĩ mera waĩyecumi mũare. ¹⁴ Mũare mũa mera majarã sãre waĩyebiribũ yũpũ. Crispore, Gayo sãre erã dihtare waĩyebũ yũhũ. “Pablo waĩyenirã dihta ãhraa,” arĩmasibea mũa. Eropigũ gajirãre waĩyebiridigũ yũ árĩgũ “Õhaa,” arĩ pepia Goãmũre. ¹⁵ Bajarã masare waĩyedigũ yũ árĩcũ “Pablo ya waĩ mera ĩgũ waĩyemi gũare,” arĩboaya mũa. Eropa arĩrã Jesucristore umupeobirã mũa yũpũre umupeoboaya. Eropigũ irire gamebirabũ. ¹⁶ Estéfana ya wihi majarã sãre waĩyebũ yũhũ. Erã nũcũ ta waĩyebũ yũhũ. Gajirã yũ waĩyenirãre guñabirica. ¹⁷ Cristo yũre obeogũ, gajirãre waĩyebure apibirimi ĩgũ yũre. Õari buherire werebupũre apimi ĩgũ yũre. Iri õari buheri “Cristo ĩgũ crusague sĩriñumi,” arĩ buheri masare gohrotori buheri ãhraa Goãmũ yare erã iiburire. Eropigũ yũhũ irire buhegũ gajigũ õaro masitarigũ iro dopa buhebeaa. Masa erã masiri mera buhebeaa. Yũhũ eropa yũ ejatuharo mera buhecũ mũa õari buheripũre umupeobiriboaya.

Goãmũ ĩgũ turarire ĩgũ masiri sãre opagũ ãhrimi Cristo, arĩ gojañumi Pablo

¹⁸ Peamegue dederemorãpũ iri buheri “Cristo crusague ĩgũ sĩridi árĩmi,” arĩ buherire peerã õpa arĩma: “Pee masibirã ya buheri ãhraa,” arĩmaacãma. Maripũ Cristo ĩgũ taumorã arĩrã õpa arãa: “ ‘Crusague ĩgũ marire sĩridi árĩmi,’ arĩ buheri tura ãhraa. Iri buheri mera Goãmũ

marire gohrotomi,” arãa mari. ¹⁹ Eropa ta arĩnumi Goãmꝑꝑũ ĩgꝑ yare erã gojarapũgue:

Eropirã i yeba majarã masare “Õaro masirã ãhraa,” erã basi arĩrãre erã masiripꝑ duhpiburi árĩbeaa, arĩ ĩhmugꝑca yũhũ, arĩnumi Goãmũ.

²⁰ Eropirã i yeba majarã õaro masirã duhpimorã árĩbeama. Erã pepiro dopa buherã sã duhpimorã árĩbeama. Dohpaguere wereniguimehrerã sã duhpimorã árĩbeama. I yeba majarã “Õaro masirã ãhrima,” arĩnirã erã árĩquerecũ ta “Pee masibirã erã ãhrima,” arĩ ĩhmumi Goãmũ erãre. ²¹ Goãmũ tamera õaro masigũ ãhrimi. ĩgꝑ eropa árĩcũ i yeba majarã erã ya masiri mera Goãmũ yare ne masisũya mariroca erãre. Goãmũ “Erã masiri mera yũre masisome,” ĩgꝑ arĩdiro dopa ta eropa wahabũ erãre. Õpa arĩnumi: “Yaha õari buherire werecũ masa yũre masirãcoma,” arĩnumi. Eropigũ “Iri buheri pee masibirã ya buheri ãhraa,” gajirã arĩquerecũ, gajirãpũre erã õari buherire peerãpũre Goãmũ taumi. Cristore erã umupeocũ ĩagũ “Erãre peamegue wabonirãre taugũra,” arĩmũhtarũ.

²² Judio masa deyoro moarire ii ĩhmudorema erã iri buherire umupeoboro core. Eropirã griego masa judio masa árĩbirã árĩrãpũ erã pepiro dopa buhecũ gahmema. ²³ Maripũ “Jesuscristo mari ñeri iira dipuwaja crusague sĩridi árĩmi,” arĩ buherire buhea mari. Iri buherire peerã judio masapũ gamebeama. Eropirã iri buherire judio masa árĩbirãpũ “Pee masibirã ya buheri ãhraa,” arĩma. ²⁴ Goãmũ ĩgꝑ yarã

árĩmorã ĩġu beye aĩnirãpũ iri buherire pee õpa arĩ masima: “Goãmũ masipehogũ turagũ ãhrimi. Cristo marire sĩribasara mera marire peamegue wabonirãre Goãmũ taumi,” arĩ masima. Erã judio masa, judio masa árĩbirã sã eropa arĩ masima Jesu yarã árĩrã. ²⁵ Goãmũ õaro masipehogũ ãhrimi. “Goãmũ pee masibigũ ãhrimi,” masa arĩ pepiquerecũ ta i yeba majarã tauro õaro masipehogũ ãhrimi. Eropigũ “Turabigũ ãhrimi,” masa arĩ pepiquerecũ ta erã wecague turatarinũgagũ ãhrimi ĩġu. ²⁶ Yũ acawererã, Goãmũ mũare ĩġu beyeboro core mũa árĩmũhtarare guñaque. I yeba majarã “Õaro masirã ãhrima,” erã arĩnirã watopegue Goãmũ mũare bajamerãgã dihtare beye aĩdi árĩmi. Eropirã masa tĩrã oparã sã árĩnirã bajamerãgã ãhraa mũa Jesu yarã. ²⁷ I yeba majarã “Pee masibirã ãhrima,” erã arĩnirã watopepũre mũare Goãmũ beye aĩdi árĩmi. Eropa beyedi árĩmi “Õaro masirã ãhrima,” erã arĩnirã erã masibirã dujaboro dopa. Eropigũ i yeba majarã “Turabirã, doyarã ãhrima,” erã arĩnirãre Goãmũ aĩdigũ árĩmi doyarãbirãpũ erã doyarã dujaro dopa. ²⁸ Masa erã ĩadiabirãre “Duhpimorã árĩbeama,” arĩma. Erã eropa arĩnirãre bu árĩrãre Goãmũ ĩġu yarã árĩmorãre aĩdigũ árĩmi mũare. Eropa aĩġu i yeba majarã oparãre, guhyadiarãre, “Gũapũ bu árĩrã ãhraa,” erã arĩcũ iĩġu iĩmi Goãmũ erãre. ²⁹ ĩġu eropa iicũ i yeba majarã ne yujugũ ĩġu gamero mera “Yũ tamera turagũ, õaro masigũ ãhraa,” arĩ tarinũgamasibeami Goãmũ ĩġu ĩacũ. ³⁰ Goãmũpũ marire Jesu-

cristo yarã árĩcũ iimi. Īgũ yarã árĩrã ɯmuri nũcũ Goãmũ mera árĩrãca mari. Jesucristopũ Goãmũre ðaro masicũ iimi marire. Eropigũ mari ñerire cóãgũ marire ðarire gohrotocũ iigũ àhrimi. Eropigũ marire peamegue wabonirãre taubu àhrimi. ³¹ Īgũ eropa iicũ Goãmũ yare erã gojarapũ ĩgũ arĩ gojadiro dopa ta eropa wahaa. Ōpa arĩ gojañuma: “ ‘Yũ gamero masipehogũ àhraa,’ arĩgũ irire arĩbircãporo. Ōpa arĩporo: ‘Mari Opũpũ masipehogũ ta àhrimi,’ arĩporo ĩgũ,” arĩ gojañuma Goãmũ yare erã gojarapũgue.

2

Cristo crusague ĩgũ sĩrira buheri àhraa i, arĩ gojañumi Pablo

¹⁻² Yũ acawererã, mũa pohro wabu ðpa arĩ pepibũ yũpũ: “Erã mera árĩgũ Jesucristo crusague sĩridigũ waĩpeo ĩgũre erã masiburi dihtare buhegũra erãre,” arĩ pepibũ mũare. Eropigũ mũa pohro árĩgũ Goãmũ yare mũare buhebũ. Goãmũ yare mũare buhegũ, weretarinũgagũ iro dopa “Masitarigũ àhraa,” arĩ buhegũ iibiribũ. ³ Eropigũ mũa mera árĩgũ bu árĩgũ iro dopa árĩbũ yũhũ. Eropigũ yũre umupeori arĩgũ doyañariro dopa buhebũ yũhũ. ⁴ Eropigũ Goãmũ yare buhegũ “Masipehoa yũhũ,” arĩgũ weretarinũgagũ iro dopa buhebiribũ. Īgũ yare buhecũ Espĩritu Santo ĩgũ turari mera mũare iri buherire umupeocũ iimi. ⁵ Eropã ta arĩ buhebũ yũhũ mũare masa erã gamero erã ya masiripũre mũa gamebiriboro

dopa. Goãmũpũre mũa umupeoburire eropa arĩ buhebũ yũhũ “Goãmũ turagu ãhrimi,” mũa arĩboro dopa.

Espĩritu Santopũ Goãmũ ãgu arĩricũrĩre buhemi marire, arĩ gojañumi Pablo

⁶ Eropirã Goãmũ ya buherire Jesure ðaro umupeorãguere werea gũa. Iri buheri masiri ta ãhraa. I mũmũ maja masa erã gamero erã masiri iro dopa arĩbeaa i mũare gũa buheri. I yebare dorerã ya masiri sã arĩbeaa. Erã masiri i mũmũ mera pehrero iiaa. ⁷ Goãmũ ya masiripũre werea. Iribojegue i buherire ne masisũya mariyoro. Negohraguere mari ðaro arĩborore Goãmũ arĩ pepituhajamũripũ. Marire peamegue wabonirãre ãgu tauborore, ãgu mera mari arĩboro sãre “Masare eropa ta iigũra,” arĩ pepiyupũ. ⁸ ãgu masare ðaro arĩ pepirare i mũmũre dorerã masibiriñuma. Irĩre ðaro masirã, mari Opũre Goãmũ magũ gohrare crusague pabia wejẽbiriboañuma erã. ⁹ Erã eropa masibirirare Goãmũ yare erã gojarapũgue ðpa ãhraa:

Arĩpehrerã Goãmũre mahirã ya arĩburire Goãmũ ðaro amubasayutuhapũ. Iri ãgu amubasarapũre masare masima masiya mara. Ne gajino iro dopa ãya mara irire, arãa Goãmũ yare erã gojarapũgue.

¹⁰ Iri eropa arĩquerecũ ta Espĩritu Santopũ Goãmũ yare, masisũya marirare masicũ iimi marire. Arĩpehreri Goãmũ yare ãgu pepira sãre Espĩritu Santo masipehomi. Eropa masigu ãgu marire irire masicũ iimi.

¹¹ Ne gajirãpũ masũ ãgũ pepirire masibeama. Masũpũ ãgũ seyaro ãgũ guñarigue ãgũ pepirire masimi. Eropa ta masa Goãmũ ãgũ pepirire ne masibeama. Espíritu Santo dihta ãgũ pepirire masimi. ¹² Eropirã mari Jesu yarã árĩrã erã i umũ majarã Jesu yarã árĩbirã erã pepiro dopa pepibeaa. Goãmũ ãgũ Espíriture ohomi maripũre ãgũ pepiro dopa mari pepiburire. ãgũ marire õaro ãgũ orare masicũ iimi Espíritu Santopũ. ¹³ Eropirã Goãmũ yare mũare buherã, masa ya masiri mera gũa gamero buhebeaa gũa. Espíritu Santo ãgũ gamero dopa ãgũ gũare wereniguidoreripũre mũare buhea. Eropa buherã Espíritu Santo gamero dopa Goãmũ yare õaro buhea gũa ãgũ yarãre.

¹⁴ Espíritu Santore opabirãpũ irire Espíritu Santo yare erãre buhecũ, “Pee masibirã wereniguiiri ãhraa,” arĩma erã. Eropirã gamebeama. Espíritu Santo ãgũ itamuro mariro ãgũ yare masima masiya mara masare. Eropirã erã ãgũ yare ne masibeama. ¹⁵ Espíritu Santore oparãpũ Goãmũ yare õaro masima. Gajirãpũ erãre “Pee masibirã ãhrima,” arĩmasibeama Espíritu Santore oparãre. ¹⁶ Õpa arãa Goãmũ yare erã gojarapũgue: “Ne yujugũ ãgũ gamero mera mari Opũ ãgũ guñarire masigũ ne marimi. Eropirã ãgũre masa ne buhemasibeama,” arãa ãgũ yare erã gojarapũgue. Maripũ Cristo yarã árĩrã, Cristo iro dopa masia.

3

Jesu yarã yujuro mera Goãmũ mohme corerã

ãhrima, arĩ gojañumi Pablo

1-2 Yũ acawererã, mũare buhegu Espíritu Santore òaro yũhrirãre yũ buhediro dopa buhemasibiribũ mũapũre. Mũa pepiri Espíritu Santo opabirã pepiro dopa árĩbũ. Cristo yarã mũa árĩquererã ta ìgũre òaro yũhrirã árĩbirã majirãgã erã pee masibiro dopa ta Goãmũ yare òaro pee masibiribũ mũapũ dohpa. Eropa mũa pee masibiricũ ìagũ Goãmũ yare òarire buhenemo-masibiribũ mũare. Eropigũ majirãgãre apĩco dihtare mari oro dopa ta diasabiriri buheri dihtare buhebũ daja mũare. Dohpague sãre mũararo ta masinibea dohpa mũa. ³ Òpa iirã iiaa mũa Espíritu Santore yũhribirã. Mũapũ mũa mera majarãre ìadiabirã, erã gajinore opacũ ìhaturirã, mũa basi yujurãyeri cururi Yũ acawererã, mũare buhegu Educa warirã iiaa. Eropirã Espíritu Santore opabirã Cristore gamebirã iro dopa iirã iiaa mũa. Eropirã Goãmũ yare òaro peebeaa mũa. ⁴ Òpa ãhrayoro mũa. “Pablo ya curu majarã ãhraa gũa,” arãyoro mũa yujurãyeri. Eropirã gajirã mũa mera majarãpũ “Apolo ya curu majarã ãhraa gũa tamera,” arãyoro mũa. Eropa arĩ dũyasorã Espíritu Santore opabirã iro dopa arĩ wereniguia mũa.

⁵ ¿Yũhũ Pablo, Apolo mera duhpimorã ãhriri gũa mũa pepicũ? Árĩbeaa. Goãmũre mohme corerã ãhraa gũa. Gũare ìgũ iidorero dopa iimorã ãhraa. Eropirã gũa mũare buhecũ peerã Jesucristore umupeonũgabũ mũa. ⁶ Òari buherire buherã pohegue mohme corerã iro dopa ãhrima mari werenigui queori mera

buhecũ. Pohegue ĩgu otemũhtadiro dopa ta yũhu mũare Goãmu yare buhemũhtabu. Eropigu gajigu ĩgu pohere ĩhadiburo dopa ta Apolopũ yũ pũhrũ mũare buhenũrusiami. Gũa eropa buhequerecũ ta pohe maja yucũre iri bugacũ ĩgu iidiro dopa ta Goãmũpũ mũare ĩgu yare masinemocũ iimi. ⁷ Eropigu yũ buhemũhtadi áriqueregu ta bu áriũgu áhraa. Eropigu Apolo yũ pũhrũ buhenemodi sã bu áriũgu ta áhrimi. Goãmu tamera õagũ áhrimi. ĩgũpũ mũare ĩgu yarã áricũ ĩgũre masinemocũ iimi. Eropirã Goãmũpũre umupeoro gahmea mũare. ⁸ Otemũhtagu pũhrũ pohere ĩhadibugũ yujuro mera mohme corerã áhriima erã. Eropirã erã nũcũ erã mohmediropẽ ta wajatama erã. Eropa ta áhraa gũa Apolo mera. ⁹ Eropirã gũa Goãmu yare mohme corerã áhraa. Eropa gũa mohme corerã Apolo yũ mera majagũ áhrimi. Mũapũ Goãmu ya pohe iro dopa ta áhraa. Mũa eropa áricũ Goãmu ya pohe iri maja yucũre ĩgu buganemocũ iidiro dopa ta mũare ĩgu yare masinemocũ iimi ĩgu.

Eropigu Goãmu mũare ĩgu yarãre õarã áricũ ĩigu iimi. Eropirã mũa Goãmu mohmeri wihi iro dopa áhraa mũa gaji werenigui queori mera werediacũ. ¹⁰ Yũre Goãmu ĩgu ita-muro mera yũpũ wihi iimehregũ borari ĩgu nugumũhtaro dopa ta Jesucristo yare mũare buhemũhtabu. Eropigu iri weca gajigu ĩgu peoturia mũriaro dopa ta gajigu yũ pũhrũ buhenemogu iimi. Eropa buhenemogu õaro gũhyadiaro mera Goãmu yare buhero gahmea

ĩgũre. Queoro buhero gahmea. ¹¹ Wihire iirã bo-
 rarire nugumãhtabiricũ wihi iima masiya mara.
 Eropa ta Cristore buhebiricũ ĩgũ yarã wacũ
 iima masiya mara. Cristo mari ya dipuwajare
 s̄iribasare m̄are buhetuhajabũ. Eropirã m̄a
 Jesucristore umupeorã Goãmũ yarã watuhajabũ.
 M̄a eropa árĩrãguere gaji buherire buhema
 masiya mara m̄a Goãmũ yarã wamorãre.
¹²⁻¹⁵ Goãmũ yarãre buhenemorã àhrama. Erã
 watope gajirã queoro buhema. Gajirã queoro
 buhebeama. Queoro buheri oro, plata, waja
 pagari utãyeri iro dopa àhraa. Queoro árĩbiriri
 buheripũ yucũ, taa, ñaira pũri iro dopa àhraa.
 I umũ pehrerinari árĩcũ Jesucristo dujarigũ
 mari buhera queoro árĩcũ ĩhmugũcumi. Mari
 buherare soẽnagũ iro dopa ta queoro árĩcũ
 ĩhmugũcumi. Eropiro oro, plata, waja pagari
 utãyeri soecũ ãjubiro dopa ta mari buhera
 queoro ta árĩro dujaroca ĩgũ ĩacũ. Eropa mari
 queoro buhenirã mari árĩcũ õaro mari buhera
 waja wajayegũcumi. Eropa ta yucũ, taa, ñaira
 pũri soecũ ãjupehrero dopa ta mari buhera
 queoro árĩbiro pehreroca ĩgũ ĩacũ. Eropigũ
 queoro buhebirinirã mari árĩcũ ĩagũ marire
 wajayesome. Erã eropa árĩrã erã wajatabiri-
 querecũ Goãmũ erãpũre taugũcumi. Eropirã
 eropa queoro õaro buhebirinirã merogã mera
 tarirãcoma. Eropirã wihi ãjurisubu tariro dopa
 tarirãcoma.

¹⁶ M̄a Jesu yarã mera Espĩritu Santopũ m̄a
 mera àhrimi. Eropirã m̄a Goãmũ ya wihi iro
 dopa àhraa. ¿Irire masibeari m̄a? ¹⁷ Eropirã
 m̄a Goãmũ ya wihi árĩro dopa árĩrã ĩgũ

yarã gohra ãhraa. Eropigu ïgu yarãre yujugu ïgu goroweocũ Goãmũ peamegue dedeogucumi ïgũpũre.

¹⁸ Irire õaro masique mũa. Mũa basi pee wisibiricãque. I mũmũ maja buherire opagu “Masitarinugagu ãhraa,” arĩ pepibocumi. Eropa arĩ pepigu mũa mera majagu árĩgu, “Yũhũ Goãmũ masiri mariro pee masibigu ãhraa,” arĩ pepiporo ïgu. ïgu Eropa arĩ pepigu diaye ta õaro masigu wagucumi. ¹⁹ I mũmũ maja masa erã gamero erã basi masiri “Bu gohra ta ãhraa,” arĩ pepimi Goãmũ. Eropa ta werenemoa Goãmũ yare erã gojarapũ. Õpa arĩ gojara ãhraa: “Erã gamero masirã erã pepiri mera ‘Õpa iirãra,’ erã arĩrare gajiropa wacũ Goãmũ iimi,” arãa Goãmũ yare erã gojarapũ. ²⁰ Eropi gajipũgue õpa arãa daja: “Masa erã gamero ‘Masipehorã ãhraa,’ erã arĩ pepiri duhpiburi árĩbiricũ masimi mari Opũ Goãmũpũ,” arãa Goãmũ yare erã gojarapũgue. ²¹⁻²² Eropirã “Pablo ya curu majarã ãhraa gũa,” arĩrã, “Apolo ya curu majarã ãhraa gũa,” arĩrã, “Pedro ya curu majarã ãhraa gũa,” arĩrã arĩbiricãque mũa pare. Gũa árĩpehlerã mũa ya árĩburire iirã dihta ãhraa. Goãmũ árĩpehlerĩ mũa ya árĩburire otuhajadigu árĩmi. ïgu ïhacũnugurare mũa ya árĩburire odigu árĩmi mũare. Mũare ojocaricũ iimi mũa ya árĩburire. Eropigu sĩricũ sãre iigucumi mũa ya árĩburire. Dohpague mũa árĩrĩre, pũhrũgue mũa árĩburi sãre ogucumi. Eropirã árĩpehlerĩ mera ãhraa. ²³ Eropirã mũapũ Cristo yarã ãhraa ïgu ya árĩburire iimorã. Eropigu Cristopũ Goãmũ yagu

ãhrimi ïgũ ya árfiburire iibu. Eropirã “Gua tam-
era Pablo ya curu majarã ãhraa,” arĩbiricãque
mũa pare.

4

*Cristo ïgũ yare ïgũ buhedoregũ ïgũ apinirã erã
mohmerire wererũ Pablo*

¹ Õpa arĩ pepique mũa yũre, Apolo sãre: Eropa
ta erã Cristore mohme corerã ãhrima. Eropirã
“Masa erã masibirirare Goãmũ yare buhedore
ïgũ apinirã ãhrima,” arĩ pepique mũa. ² Yujugũ
ïgũ ya árfiburire iidore apinirãre ïgũ gamero
dopa ta ii corero gahmea erãre. Yũ sãre eropa ta
ii corero gahmea Cristo ïgũ gamerire. ³ Mũa yũre
werewũaquerecũ eropa pepicãa yũhũ. Gajirã
masa erã yũre werewũacũ sãre eropa pepicãa
yũhũ. Yũ iirire ïarã “I ðari ãhraa. I ñeri ãhraa,”
arĩ beyemasibea mũa yũre. Yũ basi árfiqueregũ
yũ iirire ðaro beyemasipehobea yũ sã. ⁴ Õpa
arĩ pepia yũhũ. “Mari Opũ yũre ïgũ apidiro
dopa ïgũ gamerire iipehorabũ yũhũ,” arĩ pepia
yũhũ. Yũ ðpa arĩ pepiquerecũ ta yũ arĩ pepiri
diaye árfibiriboca. Mari Opũ Cristo dihta yũ
iiricũre ïagũ ðaro masimĩ yũ ïgũ yare ðaro
iicũ. ⁵ Eropirã mari Opũ ïgũ dujariboro core
masare erã iirare arĩ werewũabiricãque. ïgũ du-
jarigũ masa erã iirare iribojegue gajirã erã masi-
birirare Cristo deyoro moagũcumi. Eropirã mari
iidiarare ïgũ masicũ iigũcumi gajirã masare.
Irisubu ta mari nũcũre ïgũ yare mari iidiro dopa
ta “Irire ðaro iiabũ,” arĩgũcumi Goãmũ marire.

6 Yũ acawererã, yũhũ Apolo mera gũa árĩricũre werebũ yũhũ mũare buhebu. Eropa werebũ Goãmũ ãgũ yare ãgũ gojarapũ ãgũ arĩdirore mũa tarinũgabiriboro dopa. Eropa tarinũgabirã árĩrã mũa yujurãyerire umupeo-biricãque. Mũa eropa iibirã árĩtarinũgadiarã iiaa. 7 Mũa eropa iibiriboro dopa gũa iirare werebũ mũare. Mũa eropa tarinũgadiaquererã mũarũ gajirã tauro õarã árĩbeaa mũa. Goãmũ mũare ãgũ ora dihtare opaa mũa. Eropirã ãgũ mũare masicũ iira dihtare masia mũa. ¿Mũa gamero oparã, mũa bocatũuro masirã árĩbiriquererã ta, duhpirã “Masipehorã ãhraa,” arĩri mũa? Eropa arĩrã “Goãmũ gũare obirimi. Eropigũ gũare masicũ iibirimi,” arĩdiarã dopa ta iiaa mũa.

8 Mũarũ “Árĩpeherrerire opaa gũa. Gũare ñehe duhyabeaa,” arĩraa mũa. Eropirã gũa mũa pohro árĩbiricũ õpa arĩ pepiraa: “Oparã iro dopa masirã ãhraa gũa,” arĩ pepiraa mũa. Diaye ta oparã iro dopa mũa masipehorã árĩcũ mũare õatariaboya. Mũa eropa árĩcũ mũa mera gũa sã oparã iro dopa masipehorã árĩboya. “Masirã ãhraa gũa,” arĩ pepirã, ¿õaro arĩ pepiri mũa? Õaro pepibeaa yũ ãacũ. 9 Õpa arĩ pepia yũ tamera: Goãmũ gũare Jesu ãgũ yare buhedore apinirã doca maja curu apimi gũare. I yeba majarã masa, anyua sã gũa ñero taricũ gũare ãamũrima eropa wacũ. 10 Cristo yare gũa buhecũ ãarã, “Pee masibirã ãhrima,” arĩma masa gũare. ¿Mũarũ Cristo yare õaro pee masirã ãhriri mũa? “Turabirã, bu árĩrã ãhrima,” arĩma masa gũare. ¿Mũarũ õaro turarã ãhriri mũa?

Mua basire umupeoa. Guapure masa ne umupeobeamā. ¹¹ Guapū dohpaguere ñero tarirā, oaboarā, ñemesiburā, ñeri suhricurā, wiri moorā āhraa. Eropirā guare gajirā umupeobirā, guare pabiramurima. ¹² Eropirā gua buhenigu-iquererā teboricurā árīrā gua árīburi majare gua baburi sāre mohmea. Eropirā gajirā guare erā ñero wereniguiquerecū ta guapū Goāmure ōaro erā árīburi serēbasaa. Eropa iirā gajirā guare ñero iimorā erā nuruquerecū ta eropa pepicāa gua. ¹³ Eropirā “Ñero iirā āhrima,” guare erā werewuquerecū ta guapū erāre ōaro wereniguia erā ōaro árīburi. Eropirā erā burigā dohoma guare. Iribojegue eropa iinugama. Dohpague sāre muraro ta iima guare.

¹⁴⁻¹⁵ Mware ōari buherire buhemuhtabu. Eropa buhecū mua peecū Jesucristo mware igu yarā wacū iidi árīmi. Eropa mware buhedigu mua pagu iro dopa ta wahabu yuhu. Bajarā mware Cristo yare buherā erā árīquerecū ta mware buhemuhtagu yuhu yujugu ta āhraa. Eropigu yuhu yujugu ta mua pagu iro dopa āhraa. Eropigu mware guhyasīricū iibu ire gojagu iibea. Yu porā yu mahirāre mware werebu ire gojaa yuhu. ¹⁶ Eropigu ire turaro mware werebu iiaa yuhu. Yure ihacūque mua sã.

¹⁷ Mua eropa iicū gamegu mua pohro Timoteore obeogu iiaa. Igu yu magu iro dopa yu mahigu mari Opū Jesucristo yagu āhrimi. Eropigu Cristo gamero dopa iiniguigu āhrimi igu. Timoteo mua pohro ejaqu Jesucristo yare yu iidiro dopa mware guñacū iigucumi mua sã

eropa iiboro dopa. Jesu yarã pohrogue noho wagu Jesucristo yare erã iiburire buheniguicãa. ¹⁸ Yujurãyeri mua mera majarã oparã árĩdiarã õpa arãñorã: “Pablo mari pohroguere arisome,” arĩ pepirañorã erã. ¹⁹ Goãmũ gamecũ mua pohrogue dohparagã ta ejagũca. Eropa ejagu erã oparã árĩdiarã mua mera majarã erã eropa arĩrare ïagũra. Eropigu erã Goãmũ turari opacũ ïagũra yũhũ. ²⁰ Goãmũ mari Opũ ãhrimi. Mari arĩ weretarinũgaquerecũ ta ïgu yare mari iibiricũ mari wereniguri duhpiburi árĩbeaa. ïgu turari mera ïgu gamero dopa iicũ gahmemi. ²¹ ¿Mua pohrogue mua ya dipuwaja dipuwaja moagu yũ wacũ gahmeri mua yũre? ¿O mua õaro iira waja mucubiriri mera waro gahmeri mua yũre?

5

Corinto majarã erã ñeri iirare werepũ Pablo

¹ Gajirã õpa arĩ querecũma guare: Yujugu mua mera majagu ïgu buamore ta marapocũ waĩcũmi. Eropa ta arĩ werema masa guare. Erã eroparĩcũ peemaria wahabũ. Gajirãpũ Goãmũre masibirã árĩquererã erãpũ eropa iirã árĩbeama. ² Mua mera majagu ïgu eropa iiquerecũ ta mũapũ “Õatariarã ãhraa gua,” arĩ pepiraa. ¿Duhpirã ïgu eropa ñeri iirare masiquererã ta guhyasĩrisãbeari mua ïgũre? Eropa ñero iigũre mua Jesu yarã mera majagũre cóãcãque mua. ³⁻⁴ Yũhũ mua mera árĩbiriqueregu ta yũ guñari mera mua mera árĩgu iro dopa ãhraa yũhũ. Eropigu mua mera árĩgu yũ árĩbodiropo dopa

ta ñero iigure ïgu eropa ñero iira dipuwaja, dipuwaja moadoretuhaa yũhũ. Jesucristo ïgu dorero mera ta eropa iidorea. Eropa mua Jesu yarã gamenererã yũ guñabeori merague yũhũ mua mera árĩcũ, mari Opũ Jesu ïgu turari mera⁵ ïgure ñero iigure cóãque. Watĩ mera ïgu ñero tariborore apique. Eropa ta cóãque ïgure ïgu ñero tariri mera ñerire ïgu ñaribejarire ïgu gohrotoboro dopa. Mari Opũ Jesucristo ïgu ñujaririnũ ñero iidigu mũru Jesu mera ïgu ñaro tariboro dopa dohpaguere ïgure eropa apinique, arãa yũhũ.

⁶ “Ñaro ñhraa gũa,” mua arĩquererã ta ñero iirã iica mua. Ñero iigu ïgu ñerire mua eropa ñacãrã, arĩpehreri ñeri mũare ii ñhmucũ arĩpehrerã ñero iirãca. Eropiro arĩpehreri ñeri sehya wa mua arĩroque. Panre bũgacũ iiri pohga ñaro seyanũgajaro dopa ta iri ñeri ñaro seyaroca mũaguere. ¿Irire masibeari mua?⁷ Yũ acawererã judio masa Pascua árĩcũ ovejare wejẽmũrima erã ñeri iira dipuwajare Goãmure cãdijidorerã. Oveja sĩridiro dopa ta Cristo mari ñeri dipuwajare sĩribasadi arĩmi. ïgu eropa sĩribasarañe mera mua ñerire cóãñirã ñhraa. Irire guñarã mũapũ ñero iigure mua mera majagure cóãque ñeri mua watope mariboro dopa.⁸ Iribojegue ñerire ñhacũ iinirã arĩribũ mari. Eropirã dohpaguere mari ñerire cóãñirã arĩrã mari ñerire ñaribejaro mariro, ñero iiro mariro arĩrã. Iribojegue mari ñerire iimũridiro dopa ta iibiricãrã. Eropirã diaye maja ñaro wereniguiiri mera, ñaro iiricũri mera arĩrã pare.

9 Mũare yũ gojabeorapũre nome mera ñero iirã, ñerire iimajiñajarã mera ne wapicũdorebiriribũ. 10 Eropã arĩgũ “Jesu yarã árĩbirã mera árĩbircãque,” arĩbiriribũ. Eropigũ “Nome mera ñero iirã mera, gajinore turaro gamenemocãrã mera, yajaricũrã mera, goãmarã wéanirãre umupeorã mera árĩbita,” arĩbeaa. I yebare eropa árĩrã mariro Jesure gamebirã mariro mari dihta árĩmasibea. Árĩpehrerogue ahrima erãpũ ta. 11 Eropigũ mũare gojabeogũ õpa arĩ doreribũ: “Mũa mera majarã Jesu yarãpũ erãpũ ñerire iicũ ñha erãpũre wapicũbircãque,” arĩ goja doreribũ. Eropirã mũa mera majagũ “Jesu yagũ ahraa,” ñgũ arĩgũ árĩqueregũ ta nome mera ñero ñgũ, gajinore turaro gamenemogũ, goãmarã wéanirãre umupeogũ, ñero quere moa coregũ, merericũgũ, yajaricũgũ ñgũ árĩcũ ñgũpũre wapicũbircãque. Eropirã eropa ñgũ mera ne babircãque. 12-13 Jesu yarã árĩbirãpũre Goãmũpũ dipuwaja moagũcumi. Eropigũ Jesu yarã árĩbirãre erã ñero iiri dipuwaja moadoregũ árĩbeaa yũhũ. Eropã iibircãro gahmea yũre. Eropã arĩquerecũ ta mari Jesu yarã watope mari ñero iira dipuwajare moaro gahmea mari basire. Eropirã mũa Jesu yarãpũ mũa mera gamenererã mũa basi mũa iirare ñha masiro gahmea mũare. Eropirã yujugũ mũa mera majagũ ñgũ ñero iicũ ñarã ñgũre dipuwaja moadorero gahmea mũare. Eropirã Goãmũ yare gojarapũgue arĩdiro dopa mũapũ mũa mera majagũre ñero ñgũre dipuwaja moaro dopa iirã

ĩgũre cóãque.

6

Jesu yarãre weresãrare werepũ Pablo

¹ ¿Mũa basi game dũyatorire duhpirã Jesu yarã árĩbirã pohroque amudorerã wahari mũa? Jesu yarãre mũa mera majarãre weresãdiarã gajirã Jesu yarãre irire werero gahmea mũare. Eropirã Jesu yarãpũ amubasaporo. ² Pehrerinũ árĩcũ mari Jesu yarãpũ mari árĩpeherrerã masa erã iirare beyerãca. ¿Iirire masibeari mũa? Eropirã pehlerinũ árĩcũ masa árĩpeherrerãre beyemorã árĩrã, dohpague sãre amumasia mari. Eropirã dohpague gajiropa wacũ sãre amumasia mari. ³ Anyua erã iira sãre beyerãca mari. ¿Iirire masibeari mũa? Mari eropa anyuare beyemorã árĩrã diaye ta dohpague sãre Jesu yarã erã iirare ãarã beyemasica mari. ⁴ ¿Eropirã duhpirã mũa mera majarãre weresãdiarã Jesure gamebirã, “Bu árĩrã” mũa arĩrã pohroque amudorerã wahari mũa? ⁵ Ire arĩgũ iiaa mũa guhyasiuro mũa tariborore. Mũa dũyatorire werebu õaro masigũ árĩcumĩ mũa watopere, yũ arãa. ⁶ Ĩgũ eropa árĩquerecũ ta mũa mera majagũ Jesu yagũ gajigũ ĩgũ acaweregũre weresãdiagũ Jesu yarã árĩbirãre beyedoregũ wahami.

⁷ Masare beyegũ pohroque mũa acawererãre weresãrã Goãmũ gameripũre tarinũgarã iiaa mũa. Gajigũ mũa mera majagũ mũare ñero ĩgũ iicũ eropa ãacãboaya mũa. Jesu yarã árĩbirãre mũa weresãbiriborore mũa acaweregũre mũare ĩgũ ñero iirare mũa eropa ãacãcũ

õatariaboaya. Jesu yagu mũare ãgu yajacũ ãgure mua weresãboro core ãgu mũare yajarare mua eropa ãacãcũ õaboaya. ⁸ Mũa eropiibeaa. Gajirãre ñero iirã ãhraa mua sã. Yajarã ta ãhraa mua sã. Jesu yarã mua acawererã erã áríquerecũ ta erãre ñero iirã, yajarã iiaa mua.

⁹ Eropa iirã Goãmũ ãgu opu áríroguere wamasibeama. ¿Irire masibeari mua? Pee wisibiricãque mua. Õpa iirã Goãmũ pohroguere wasome: Gajirã nome mera ñero iirã, goãmarã wéanirãre umupeorã, gajigu marapore marapocurã, gajigu marapu mera ñero iirã nome, uma seyaro erã dupuri mera ñero iirã, nome sã eropa ta iirã, ¹⁰ yajarã, gajinore turaro gamenemorã, merericurã, gajirã masare ñero quere moa corerã, gũyari mera yajarã ne Goãmũ ãgu opu áríroguere wamasibeama. ¹¹ Iribojeguere mua yujurãyeri eropa iirã árĩyoro. Eropa iinirã mua áríquerecũ ta dohpaguere mua ñero iirare cóãtuhami Jesucristopũ. Eropa ãgu taunirã mua áricũ ãgu yarã árĩmorã iimi Goãmũ mũare. Eropa iigu “Õarã ãhrima,” arĩ ãhami ãgu mũare. Eropa ta iimi mũare mari Opu Jesucristo mera, Espiritu Santo mera.

Mari dupu õarire iiburi dupu árĩro iiaa, arĩ gojañumi Pablo

¹² “ ‘Goãmũ iidorebirira árĩpehreri iimasiri ãhraa yũre,’ arĩmi Pablo,” arãa mua yũre. Yũ iimasipehoqueregu ta, yũ iiri yũre gajirã sãre itamubiricũ ãha irire iibeaa. Eropa ta árĩpehreri iimasiri ãhraa yũre. Eropa iimasiqueregu ta

yujuyerisuburi irire eropa iipogu duhumasibiri-boca, arĩgu irire iisome yũhũ. ¹³ Mari bari mari paru maja árĩburi ta āhraa. Eropiro “Mari paru bari dicuburidiru paru āhraa,” arāa mũa yujurāyeri. Mũa eropa arĩquerecũ ta puhru Goãmũpũ mari barire mari paru sãre iri pehrea wacũ iigucumi. Eropirã mũa yujurāyeri “Mari dũpũpũ mari uaribejari iiburi dũpũ āhraa,” arĩraa mũa. Eropi árĩbeaa. Mari dũpũ uaribejari iiburi dũpũ árĩbeaa. Mari dũpũpũ mari Opũ ya árĩburire iiburi dũpũ āhraa. Eropigu mari Opũpũ mari mera āhrimi mari ĩgu yare õaro iiboro dopa. ¹⁴ Eropigu Goãmũ ĩgu turari mera mari Opũ Cristo dũpũ mũrarore masupũ. Eropi ĩgure masudiro dopa ta mari dũpũ sãre masugucumi ĩgu.

¹⁵ ¿Mũa ya dũpũ Cristo ya dũpũ árĩri iro dopa árĩcũ masibeari mũa? ¿Cristo ya dũpũ árĩri iro dopa árĩrã nomeo ñero iiricũgo mera mari árĩcũ õhari mũa pepicũ? Õabirigohracãca.

¹⁶ Ñego mera yujugu ĩgo mera árĩcũ ĩgu dũpũpũ ĩgo ya dũpũ mera árĩro yuju dũpũ iro dopa ta āhraa. ¿Irire masibeari mũa? Eropi arĩ gojara āhraa Goãmũ yare erã gojarapũgue. Õpa arãa: “Nomeo mũmũ mera árĩrã perã arĩquereerã yuju dũpũ iro dopa wahama,” arĩ gojamũriñumi.

¹⁷ Mari Opũ ĩgu yarã mera āhrimi. Eropigu yujugu ĩgu mari Opũ mera perã arĩquereerã yujugu iro dopa āhrima erã guñari mera.

¹⁸ Eropirã nome mera ñero iirire, mũma mera ñero iirire uaribejabiricãque. Irire mũa uaribejabiriboro dopa ta irire duhrigã

waque. Gaji ñerire mari iira mari dupurire mari goroweobea. Nomeo mera ñero iigupũ ĩgu dupure ñetariaro goroweomi. ¹⁹ Espiritu Santore marire ohomi Goãmũ. Eropigu mari dupũ mera wihicũmi Espiritu Santo. ¿Irire masibeari mua? Eropirã mua dupũ mua ya dupũ gohra árĩbeaa. Goãmũ ya dupũ ahraa. ²⁰ Mua ĩgu yarã árĩmorãre mua ñeri dipuwajare wajayedigu árĩmi Cristo. Eropirã ĩgu yarã árĩrã mua dupũ mera Goãmũ ĩgu gamero dopa ta iique. Eropa iirã Goãmũre umupeorã iiaa mua. Eropirã gajirã sãre ĩgũre umupeocũ iirã iiaa.

7

Mojoto diririre werepũ Pablo

¹ Dohpaguere mua yũre serẽpi gojarare yũ sã mũare yuhrigura. Masũ marapo maricũ sãre õhaa yũ ĩacũ. ² Iri eropa árĩquerecũ ta ero mua árĩro baja ñaribejari ahraa. Eropirã uma erã nũcũ nome marapocũporo gajirã nome mera erã ñero iibiriboro dopa. Eropirã nome sã erã nũcũ marapocũporo gajirã uma mera erã ñero iibiriboro dopa. ³ Eropigu marapocũgure ĩgu marapore õaro iiro gahmea. Igo marapũ sãre eropa ta iiro gahmea. ⁴ Marapocũgo ĩgo dupũ ĩgo ya dihta árĩbeaa. Igo marapũ ya sã ahraa ĩgu ĩhadiburo dopa. Igo marapũ sãre ĩgu dupũ ĩgu ya dihta árĩbeaa. ĩgu marapo ya sã ahraa ĩgo ĩhadiburo dopa ta. ⁵ Mua perã árĩburire “Iibiricãrã,” arĩbita. Gajisubũ mua perã Goãmũ mera mua wereniguidiarã “I nũcũ nũri duhunirã dohpa, Goãmũ mera wereniguirã

dohpa,” yujuro mera eropa arĩrã duhumasia mũa. Mũa eropa duhura pũhrugã mũa dipaturi mũa eropa árĩniguidiro dopa ta árĩque daja watĩ ñero mũaare iidorebiriboro dopa. “Gajirã mera ñero iiboca,” arĩrã mũa basi duhubita. Mũa árĩmũhtadiro dopa ta árĩniguicãque daja.

⁶ Ire mũaare dohpague yũ arĩrare arĩgu mũaare dore gohrari mera dorebeaa. Eropa weregu iiaa mũa iiburire mũa masima õaro. ⁷ “Ƴma marapocũporo,” arĩquerecũ, árĩpehrerã mũa yũ iro dopa ta marapo marirã mũa árĩcũ õaboaya yũre. Mũa eropa árĩcũ gamequerecũ ta Goãmũ mari árĩpehrerãre yujuropa iimasiburire apibeami. Yujurãyerire marapocũmasiburire marapũcũmasiburire apimi Goãmũ. Eropigu ĩgu gajirãpũre marapocũmasibiriburire marapũcũmasibiriburire apimi.

⁸ Eropigu marapo marirãre, marapũ marirãre, wapeweyarãre õpa arãa: Marapo marirã, marapũ marirã mũa árĩmasirã, yũ árĩro dopa árĩcũ õhaa. ⁹ Eropa árĩmasibirã turaro nomere gahmema. Irirẽ turaro Ƴaribejarã diaye ta marapocũcãporo. Nome sã marapũcũporo. Mũa eropa Ƴaribejarã mũa marapocũcũ õapũricãa. Eropiro marapũcũcũ sãre õapũricãa.

¹⁰ Mũa marapocũrãre, marapũcũrã nomere õpa dorea: Yaha doreri gohra árĩbeaa i. Mari Opũ Cristo ire doredi árĩmi. Mũa nomerũ mũa marapũ sũmarãre cóãbircãque. ¹¹ Mũa marapũ sũmarãre cóãrã, marapũ marirã dujaque. Dipaturi mũa marapũ árĩdigũ mera ahmu õaro árĩbircũ daja marapũ marirã dujaque. Eropirã mũa Ƴma sã mũa marasã nomere cóãbircãque.

12 Eropigu mũa sãre gajirã sãre õpa arãa yũhũ. Mari Opu ãgu dorediro árĩbeaa i. Yũhũ ãgu apidigũpũ õpa arãa mũare: Yujurãyeri mũa mera majarã Jesu yarãpũ Jesure umupeobirã nomere marapocũrã ãhraa. Eropigu õpa arĩ werea mũare: Mũa marasã nome mũa mera erã dujadiacũ erã nomere cóãbircãque mũarũ. 13 Eropirã yujurãyeri mũa mera majarã nome Jesu yarã nome Jesure umupeobirã mera marapũcũrã nome ãhraa. Mũa marapũ sũmarã mũa mera erã dujadiacũ erãre cóãbircãque. 14 Mũa marapũ sũmarã Jesure umupeobirã erã árĩquerescũ ta Jesu yarã nomere erã marapocũcũ, Goãmũ õarã mũa iro dopa ãhami erãre. Eropirã mũa mũarũ Jesu yarã mũa árĩcũ mũa marasã nome Jesure umupeobirã nome árĩbocoma. Erã eropa árĩquerescũ ta mũa mera erã nome marapũcũcũ Goãmũ õarã nome iro dopa ãhami erãre. ãgu eropa ãbircũ mũa porã Jesure umupeobirã porã iro dopa árĩboũuma. Eropigu mũa porã sãre õarã iro dopa ãhami Goãmũ. 15 Eropirã mũa mũarũre mũa marasã nome Jesure umupeobirã nome erãpũ mũare cóãcũ õaroca. Mũa nome sãre mũa marapũ sũmarã Jesure umupeobirã erãpũ mũare cóãcũ õaroca. Mari õaro dujacũ gahmemi Goãmũ. Eropirã erã eropa cóãdiacũ “Yũ mera dujaque,” erãre arĩdorebeamĩ Goãmũ. Eropirã mũa erã marasã nome erã marapũ sũmarã árĩbeaa pare. 16 Mũa mũa mũa marasã nome mũa mera dujaquerescũ erã peamegue wabiriborore Jesure umupeocũ iimasibiriboca. Mũa nome sã eropa ta Jesucristore umupeocũ iimasibiriboca mũa

marapu sũmarãre. Eropirã erã mũare cóãdiacũ òaroca.

¹⁷ Òpa ta iiro gahmea mũare: Árĩpehrerã mũa mari Opũ Cristo mũare ìgu árĩdorero dopa ta árĩque. Goãmũ mũare ìgu apirare iique mũa. Irire árĩpehrero Jesu yarã gamenererãre eropa doreniguica yũhũ. ¹⁸ Jesu yarã mũa árĩboro core circuncisión iinirã gasiro mero wiri añirã árĩrã eropa ta dujaque. Eropirã Jesu yarã mũa árĩboro core gasiro merogã wiri aĩbirinirã árĩrã mũa árĩro dopa ta dujaque. ¹⁹ Dohpaguere gasiro mero wiri añirã mũa árĩcũ duhpiburi árĩbeaa. Irire iibirinirã mũa árĩcũ sãre gajiropa wasome. Goãmũ dorerire mari iicũpũre iri tamera õhaa. ²⁰ Eropirã Goãmũ Jesu yarã mũare ìgu aĩcũ irisubu mũa árĩmũhtadiro dopa ta dujaque.

²¹ Goãmũ mũare Jesu yarã aĩboro core gajirã pohro majarã mũa árĩcũ òaroca. Eropa ta dujanique. Mũa Opũ ìgu mũare wiudiacũ wirique mũa. Mũa wiricũ sãre òaroca mũare.

²² Òpa arĩ pepique mũa: “Yũhũ masũ pohro majagũ wiribiriqueregũ ta dohpaguere Jesu yagũ árĩgu, ìgu wiudigu iro dopa ãhraa ìgu yare iiboro dopa,” arĩ pepique. Eropa ta gajirã Goãmũ Jesu yarãre aĩcũ masa pohro majarã mũa árĩbiriquererã òpa arĩ pepique: “Dohpaguere Jesu pohro majagũ ãhraa yũhũ,” arĩ pepique. ²³ Mari ñeri dipuwajare mari ìgu yarã árĩmorãre wajayetuhadi árĩmi Cristo. Eropirã ìgu dorero dopa iique. Mũa iiburire masa dorebiricãporo. ²⁴ Eropirã yũ acawererã, Jesu yarã árĩmorã Goãmũ mũare ìgu aĩcũ irisubu

mũa ářĩmũhtadiro dopa ta dujaque. Eropa dujarã Goãmũ mera õaro ářĩque.

²⁵ Dohpaguere marapo marirãre, marapũ marirã sãre werediaa mũare. Yũ wereburi mari Opũ weredoređiro gohra ářĩbeaa. Eropa ářĩbiriquerecũ yũhũ ĩgũ mojomoro ĩadigũ, ĩgũ itamudigũ ářĩcũ mũa yũ wererire õaro mera peerãca. Õpa werea mũare. ²⁶ Dohpaguere mari ñero tarirã iica. Eropirã mũa ářĩro dopa mũa dujacũ õhaa yũre. ²⁷ Eropirã mũapũ marapocũrã, marapũcũrã sã eropa ta dujaque. Erãre cóãbircãque. Marapo marirã, marapũ marirã sã mũa ářĩrã eropa ta dujaque. Marapore o marapũre amabita. ²⁸ Eropa yũhũ mũare arĩquerecũ “Marapocũgũra,” arĩcũ gajiropa ářĩbeaa mũmare. Eropirã mũa nome sãre marapũcũdiacũ õaroca. Õpa ãhraa. Irisubu ñero taririsubu marapocũrã, marapũcũrã mũare teboricũburi dujaroca. Eropigũ mũare eropa teboricũri arĩgũ, marapo marirã, marapũ marirã dujaque, arãa yũhũ.

²⁹ Yũ acawererã, eropa arĩgũ õpa arĩdiagũ iiaa. Mari ñero tariboro merogã dũhyaa. Eropirã dohpaguere marapo marirã Goãmũ yare erã õaro mohmemasiro dopa ta, õaro mohmero gahmea marapocũrã sãre. Eropirã marapũcũrã nome sãre eropa ta Goãmũ yare õaro mohmero gahmea. ³⁰ Eropirã mari ñehamere orequererã Goãmũ yare mohmeboropũre guñaro gahmea. Bosenũ ářĩrã mucubiriquererã Goãmũ yare mohmeboropũre guñaro gahmea. Mari

asũrare opaquererã irire guñabiricãro gahmea. Goãmũ yare mohmero gahmea. ³¹ I yeba dohpague árĩro dopa pehrero iiaa. Eropirã i yeba majare iiburire wũaro guñabiricãro gahmea.

³² Mũa gajinore wũaro mũa guñaricũcũ gamebeaa yũhũ. Marapo marigũ Jesu yagũ árĩgũ mari Opũ Jesu yare ĩgũ gamerire guñaniguimi.

³³ Marapocũgũpũ Jesu yagũ i yeba maja sãre ĩgũ marapo gamerire guñami. ³⁴ Eropigũ peñe guñami. Marapũ marigo mari Opũ Jesu yare iiburire guñaniguimo. Eropa guñago igo igo dũpũ, igo pepiri mera ta mari Opũ yago õaro árĩdiamo. Marapũcũgopũ i yeba majare igo marapũ gameripũre burigã iidiamo.

³⁵ Ire mũare arĩgũ iiaa mũare itamubu. Teboricũri dorerire mũare cãhmotadiabeaa. Eropa cãhmotadiabiriqueregũ ta õaro mũa iicũ gahmea. Eropigũ baja guñaricũro mariro Jesu mari Opũ ĩgũ gameri dihtare mũa turaro iidiacũ gahmea yũhũ.

³⁶ Mũa mera majagũ ĩgũ mago igo bũro wacũ ĩagũ marapũcũdoreporo ĩgũ igore. "Iгоре õaro iibeaa. Marapũcũro gahmea igore," arĩ pepigũ ĩgũ arĩdiro dopa ta nomesoporo. Eropigo igo marapũcũmasimo. Eropa igore marapũcũdoregũ ñero iibeami. ³⁷ Gajigũpũ ĩgũ magore "Marapũcũbiricãporo," arĩbocumi. Yujugũ mũare wereyudiro mariro, yujuñe ta pepigũ árĩgũ, "Igo marapũcũbiricãporo," arĩgũ õaro iimi. ³⁸ Eropigo ĩgũ mago marapũcũdoredigo õaro wagocumo. ĩgũ mago marapũcũdorebiridigopũ gajigo tauro õaro wagocumo dohpaguere ñero taririsubu árĩcũ.

39 Marapucugore igo marapũ mera árĩniguicãdoremi Goãmũ. Igo marapũ sĩrira pũhrũ igo gajigu mera igo gamegu mera marapucũmasimo daja. Jesure umupeogũre marapucũro gahmea igore. 40 Igo marapũ marigo dujago tauro õaro mucubirigo árĩgocumo igo. Eropa ta arĩ pepia yũpũ. Eropa arĩgu Espĩritu Santo ĩgu gamero dopa ta arĩgu iiaa.

8

Goãmarã wéanirãre erã umupeomorã waimurã wejẽ erã apira barire Jesu yarã asũ baburire werepũ Pablo

1-4 “Gua tamera õaro masia,” arĩ pepiraa mũa. Eropa arĩ pepirã mũa masiri mera gajirãre masitarinugadiarã iiaa mũa. Eropa iirã gajirãre itamubeaa mũa. Gajirãre umupeori mera mahirãpũ erãre itamua erã Jesucristore umupeonemoboro dopa. “Masipehocãa yũhũ,” arĩbiricãro gahmea marire. Eropa arĩrã õaro masibea mari. Eropirã “Õaro masinibirica dohpa,” arĩ pepiro gahmea marire. Mari Goãmũre mahirãpũre marire masicũ iimi.

Eropigu goãmarã wéanirãre umupeorã erã pohro apira barire “¿Mari bamasicuri?” arĩ weregũra mũare: Goãmarã wéanirã ne duhpimorã árĩbeama. Diaye ta erã wéanirãre ne sĩporãri mara. Eropigu Goãmũ yujugu ta ãhrimi. Gajirã goãmarã marima. Ire mari masia. 5 Gajirã masa õpa arĩma. “Mari goãmarã bajarã ãhrima. Erã mari oparã ãhrima,” arĩ pepirima.

“Umusiguere, i yeba sãre goãmarã àhrama,” erã arĩquerecũ ta maripure yujugũ ta Goãmũ gohra àhrimi. ⁶ Īgũ mari Pagũ árĩpeherrerãre, árĩpeherrerire árĩdoredigũ àhrimi. Eropirã ĩgũ ya árĩburire iimorã àhraa mari. Eropigũ mari Opũ Jesucristo yujugũ ta àhrimi. Īgũ árĩpeherrerire mari Pagũre ĩhacũnugubasadigũ àhrimi. Īgũ yarã árĩmorãre iipũ ĩgũ marire. Eropirã ĩgũ mera eropa árĩniguirãca mari.

⁷ Yũ arĩdiro dopa ta eropa arĩquerecũ gajirã Jesu yarã irire masibeama. Iribojegue erã goãmarã wéanirãre umupeorã “Oã goãmarã ojocarirã àhrama,” arĩ pepimuriñorã. Irisubuguererã eropa arĩponirã árĩrã dohpague sãre erã wéanirãre erã apira barire barã “Goãmarãre umupeorã iiaa,” arĩ pepirima. Eropirã iri barire barã, “Mari ñero iirã iiaa,” arĩ pepirima òaro masibirã. Eropirã “Ñerire iirã iiaa,” arĩ pepiquererã erã irire iicũ erã pepiri gajiropa waca. ⁸ Eropigũ òpa arĩ werea mũare: Iri barire mari bacũ mari babiricũ sãre Goãmũ mera òaro árĩcũ iibea marire. Irire mari babirã ñero iibea. Mari irire barã sã gajirã tauro òarã árĩbea mari, arĩ werea yũhũ. ⁹⁻¹⁰ Eropa mũare werequerecũ òaro iique mũa. Iri barire barã mũa árĩcũ gajirã Jesu yarã mũare ĩabocoma. Mũare ĩarãpũ òaro masinibirã “Iri barire barã Goãmũre umupeobeama,” arĩ pepirã árĩrãcoma. Eropa arĩ pepiquererã mũare ĩhacũ erã sã babocoma. Iri barire eropa barã “Ñero iirã iiaa mari,” arĩ pepirãcoma erã. Erã eropa arĩ pepicũ erãpũre ñero iicũ iiboca mũa. Eropirã òaro

iique. ¹¹ M̄ap̄ masirã árĩrã, “Gua iri barire gua bacũ ãaroca,” m̄a arĩ pepirã árĩrã gajirã ãaro masibirinirãre ñero iicũ iiboca m̄a m̄are erã ihacũcũ. Erã ya árĩburi sãre s̄iridi árĩmi Cristo. Eropirã m̄a bari mera m̄a Cristo yarãre m̄a acawererãre ñero iicũ iirã erãre goroweoboca m̄a. ¹² Õaro masibirãre m̄a acawererãre erã arĩ pepiro dopa iibiricũ erã pepiri gajiropa wacũ iiboca m̄a. Eropa iirã Cristo sãre ñero iirã iiaa m̄a. ¹³ Eropiḡ wéanirãre erã ora barire yu baḡ yu acawereḡare ñero iicũ iiboca yuh̄. Jesu yarã erã ñero iicũ gamebeaa. Eropiḡ yuh̄ “¿Erãre ñero iicũ iiri?” arĩḡ, iri barire ne dipaturi basome yuh̄.

9

Pablo Jesu ĩḡ apidiḡ ĩḡ árĩrare werep̄

¹ Jesu ĩḡ yare buhedore ĩḡ apidiḡ ãhraa. Eropiḡ gajirã ĩḡ apinirã erã iiro dopa ta iimasia yu sã. Jesu ĩḡ apidiḡ ta ãhraa yu sã. Mari Op̄ Jesure ĩadiḡ ta ãhraa yu sã. Eropirã Jesu yare yu buhecũ m̄ap̄ irire ãaro peenirã árĩrã ĩḡ yarã wahab̄ m̄a. M̄a eropa ĩḡ yarã wara p̄hr̄ Jesu ĩḡ apidiḡ yu árĩrare masituhab̄ m̄a. ² Gajirã yure werewuarã “Īḡ Jesu ĩḡ apidiḡ árĩbeam̄i,” arĩbocoma. Erã eropa arĩquerecũ ta m̄ap̄ eropa arĩmasibea. M̄are yu buhera p̄hr̄ Jesu yarã warã, “Jesu ĩḡ apidiḡ ãhr̄mi,” arĩ yure masituhaa m̄a. Eropirã gajirã erã werew̄aquerecũ ta m̄ap̄ ĩḡ apidiḡ yu árĩric̄ure m̄a masia.

3 Yũre werewuarãre õpa ta arĩ yũhrigura.
4 Mũare yũ buheri waja yũ baburire, yũ
ihriburire yũre oro gahmea mũare. 5 ¿Eropigũ
marapocũgũ árĩgũ yũ marapo Jesu yago igo
árĩcũ igo mera aĩ curimasibiribocuri yũhũ mũa
pepicũ? Gajirã Jesu ĩgũ apinirã, Jesu pagũ
porã, Pedro sã erã marasã nome mera erã
curiro dopa ta yũ sã curimasiboaya. Yũ eropa
curicũ yũ marapocũgũ árĩcũ, igo sãre barire
oboaya mũa. 6 Yũhũ Bernabé mera mũare õari
buherire gũa buhequerecũ ta gũare ne gajinore
obeaa mũa. Eropirã gũa basi ta gũa baburire
mohme wajatabũ gũa. Gajirã Jesu apinirãpũre
erã buheri waja oayoro mũa. ¿Gũa dihta
eropa buherã, waja mariro buhero gahmeri mũa
pepicũ? 7 Yujugũ surara ĩgũ mohmecũ ĩgũ
oparã ĩgũ árĩburire wajayemũrima. ĩgũ basi wa-
jayebeamĩ. Barire otegũ sã ĩgũ otera dũcacũcũ
irire ta tea aĩ bamasimi. Eropigũ ovejare
ĩhadibugũ ĩgũ ejorã apĩcore aĩmasimi ihribu
ĩgũ sã. 8 Eropa arĩgũ masa erã doreri dihtare
mũare werebeaa. Goãmũ ĩgũ dorerigue ĩgũ
arĩra sãre mũare weregũ iiaa. 9 ĩgũ dorerire erã
gojarapũgue õpa arĩ werea: “Wecũ trigo yerire
ĩgũ guburi mera ĩgũ suhri wearisubu ĩgũ ba-
diacũ ĩgũ disirore cãhmotabiricãque,” arĩyoro
Moise dorerigue. Goãmũ eropa doregũ wecũare
ĩhadiburire arĩgũ iibiriñumi. 10 Eropa doregũ
gũare Goãmũ yare buherãre itamudorerore
weregũ iĩñumi marire buhebu. Pohere séanirã
sã iri dũcare aĩnirã sã erã mohmera pũhrũ,
dũcacũrisubu iri dũca wajataborore cohrema.

Eropa mohmerãre barire oro gahmea marire. ¹¹ Mũare Goãmũ ya buherire õari buherire buhebũ gua. ¿Gua eropa buheri waja mũapũre guare barire obiro gahmeri mũa pepicũ? Oro gahmea mũare. Mũa ocũ õaboaya guare. Eropa árĩquerecũ mũa obirimũribũ guare. ¹² Eropa guare obirã árĩquererã ta gajirã buherã mũare irire odorecũ mũa erãpũre ohayoro. Erã mũare odorecũ guapũ erã tauro odoremasiboaya mũare turaro gua buheri waja.

Eropa dorebonirã árĩquererã ta guapũ “Guare oque,” ne arĩbiribũ. “Cristo ya buherire gamebiribocoma gua dorecũ,” arĩrã guare duhyaquerecũ ta mũare ne odorebiribũ. ¹³ Masa Goãmũre umupeorã Goãmũ wihigue bari aĩ apima. I wihi mohmerã iri barire aĩ bahama. Eropirã Goãmũre erã umupeori mesa pohro mohmerã waibũgũre erã soedigũre masa erã aĩ apidigũre merogã aĩ bahama erã sã. ¿Irire masibeari mũa? ¹⁴ Eropa erã iidiro dopa ta õari buherire buherãre erã buhera waja oro gahmea erã baburire. Eropa ta iidorepũ mari Opũ Jesu. ¹⁵ Eropigũ mũare serẽbodi árĩqueregũ ta yũhũ gajinore ne serẽbiribũ mũare. Eropigũ ire dohpaguere gojagũ gajinore waja gamebu gojagũ iibeaa. Mũare ne waja seadiabeaa. Sĩribu árĩqueregũ ne waja gamesome yũhũ mũare. Waja mariro buhegũ sũaa. Eropigũ mũare iri buhera waja ne wajata basome.

¹⁶ Õari buherire buhedoregũ apimi yũre Goãmũ. Irire buheri masũ árĩgũ tiiaa yũhũ. Õari buherire buhebigũ ñero waboaya yũhũ. Eropigũ

iri buherire buhegu “Gajirã masitarinugagu ãhraa,” arĩbodigu ne arĩbeaa yũhũ. ¹⁷ Ōari buherire yũ gamero buhegu yũ buheri waja wajaseaboaya yũhũ. Yũ gamero buhebeaa. Goãmu ïgu yare buhedoregu apimi yũre. ¹⁸ Ōari buherire buhegu mũare yũ buhera waja serẽmasiboaya yũhũ. Eropa serẽmasiqueregu ne gajinore serẽbigu waja mariro iri buherire buhea mũare. Yũhũ eropa iigu árĩgu “Ōaro wajatagũca Goãmu mera,” arãa. Iri ta ãhraa yũ wajatari.

¹⁹ Eropigu yũhũ masare buhegu erã yũ buherire peediacũ õpa iigu iiaa Jesu yarã erã waboro dopa. Ne masa pohro majagu árĩbiriqeregu ta árĩpehrerãre pohro majagu iro dopa iiaa yũhũ erã yũ buherire peediacũ iigu. ²⁰ Eropigu yũ acawererã judio masa mera árĩgu, judio masa iiro dopa ta iiaa yũhũ yũ buherire erã peediacũ iigu. Goãmu ïgu dorera Moiserẽ ïgu apira yũre iri dorebiriqerẽcũ ta, iri doreri dihtare umupeorã mera árĩgu erã dorerire umupeogu iro dopa ta ãhraa yũ sã. Eropa ta iiaa yũhũ erã yũ buherire erã peediacũ iigu Jesu yarã erã waboro dopa. ²¹ Moise dorerire umupeobirã mera árĩgu iri dorerire umupeobigu iro dopa ta iiaa. Yũ buherire erã peediacũ eropa ta iigu iiaa yũhũ erã Jesu yarã erã waboro dopa. Eropa iiqueregu Goãmu dorerire umupeoniguia. Cristo dorerire iiaa. ²² Eropigu õaro masibirã mera árĩgu erã iro dopa ta ãhraa. “Masipehogu ãhraa,” ne arĩbeaa yũhũ erãre. Eropa ta iiaa yũhũ erã sã Jesu yarã erã waboro dopa. Eropigu

árīpehrerã masa erã árīricuro dopa ta iiaa yũũ erãre yũ buherire peediacũ iigu. Yujurãyeri Jesu taurã erã waboro dopa iiaa. ²³ Eropa iiaa õari buherire árīpehrerã erã õaro peeburire. Erã eropa peera pũhrũ Jesucristo erãre peamegue wabonirãre taumi. Eropigu yũũ erã mera õaro mucubiriborore eropa iiaa.

²⁴ Mũare werenigui queori mera õpa werea. Omabirarã erã omarã árīpehrerã omama. Erã eropa omapehrequerecũ ta bũrigã omaturagupũ omajamũhtami. Eropa ejamũhtagũ wajatami. Eropirã erã bũrigã omadiro dopa ta mũa sã Goãmũ gamerire bũrigã iique mũa wajataboro dopa. ²⁵ Árīpehrerã omamorãpũ yũ dupũre gajiropa iiri arĩrã gajinore duhucãma erã omaboro core. Eropa ta iima erã pũri berore erã wajataboro dopa. Iri pũri bero erã dipuru peyama masa erã wajatarare ĩaboro dopa. Eropiro erã eropa ii erã wajatara bero mata pehrea wahaa. Mari sã Goãmũ yare õaro buhemorã gajinore duhucãrã mari wajataboro dopa. Iri mari wajatari tamera ne pehrebeaa. ²⁶ Eropigu omabiragũ ĩgu noho gamero omaro dopa iibeaa yũpũ. Yũ gamero iimaacãbeaa. Goãmũ gamerire masigu iiaa gajirãre itamuboro dopa. ²⁷ Eropigu yũ gamero dopa iibeaa. Yũ uaribejari yũre dorebeaa. Masa erã Goãmũ mera taricũ itamuburi dihtare iiaa. Eropa iibigu gajirãre Goãmũ yare buhedigu yũ árīquerecũ ta Goãmũ yũre “Õaro iibũ,” arĩbiribocumi.

“Goãmũ ährimi,” erã arĩ goãmarã wéanirãre umupeodorebiripũ Pablo

1 Eropirã yũ acawererã, ire masique mũa. Mari ñecũ sũmarã mũra iribojegue majarã árĩpehrerã mũrague mera Goãmũ árĩmuriĩnumi. Īgũ imica curu mera erãre wamũhtaĩnumi. Erã ĩgũre eropa nũrusia wahgãrã wũariya deco diariya waĩcũriya eja õaro taribuja waĩnuma. 2 Erã árĩpehrerã imica curu doca árĩnirã wũariya taribujanirã Moise yarã waĩnuma. 3 Eropirã erã árĩpehrerã umaro maja dijuri barire bamuriĩnuma. Goãmũ ĩgũ orire bamuriĩnuma. 4 Eropa barã erã árĩpehrerã Goãmũ ĩgũ ori deco sãre ihrimuriĩnuma. Irisubuguerẽ erã ihriburi decore Goãmũ ĩgũ apira utãyegue iri decore wiridoreĩnumi. Erã iri deco ihridiro dopa Cristo iri utãyẽ iro dopa ĩgũ ta erãre ojocariro odi árĩnumi. Īgũ erã mera árĩmuriĩnumi. 5 Erã eropa wanirã erã árĩquerecũ ta erã mera majarã bajarã ñero erã iicũ ĩagũ Goãmũ erãre ĩhasũabiriĩnumi. Eropigũ erãre masa marirogue boacũ iĩnumi Goãmũ.

6 Erãre eropa wara marire gũisãburi ähraa erã iidiro dopa ta mari ñerire uaribejabiriborore. 7 Eropirã goãmarã wéanirãre erã umupeodiro dopa iibita mũa. Wecũre erã wéadigũre erã umupeodirore Goãmũ yare erã gojarapũ werero õpa arãa: “Masa erã ba doaja ihrituha, wahgãnũgaja, bosenu iĩnuma,” arĩ gojamuriĩnumi iribojeguerẽ. 8 Pũhrũ gajirã erã mera majarã nome mera ñero iĩnuma. Erã iidiro dopa iibiricãro gahmea marire. Erã eropa

ñero iira dipuwaja yujunꝯ ta erã veintitrés mil gohra masa sīria wañuma. ⁹ Gajisubugue gajirã erã yujurãyeri Goãmꝯ erã gamero dopa iicũ gamerã õpa ĩgure arĩ turiñuma. “Mari Opꝯ itamumasibeami marire,” arĩñuma Goãmure turirã. Eropa arĩ turirã ĩgure guacũ iĩñuma. Erã iidiro dopa iibiricãro gahmea marire. Erã eropa iira dipuwaja Goãmꝯ erãre añaa mera cūri wejẽdoreñumi. ¹⁰ Gajisubu daja erã mera majarã gajirã ñerã erã basi Goãmꝯ iirare dꝯyasocũ anyu masare wejẽgꝯꝯ erãre wejẽñumi. Eropirã erã iidiro dopa iibiricãro gahmea.

¹¹ Eropa iĩñumi Goãmꝯ marire buhebu. Maripꝯ pehrerinꝯ coregã árĩrã ãhraa. Mari eropa árĩrã árĩcũ iribojegue majarã erã eropa warare Goãmꝯ gojadoreñumi marire gũisãgꝯ. ¹² Eropirã mꝯꝯꝯ “Yꝯ tamera õaro iiaa yꝯhꝯ,” arĩ pepirã árĩrã õaro iique ñerire iiri arĩrã. ¹³ Mari árĩpehrerã yujugꝯ dꝯhyaro mariro yujyerisuburi ñerire guñaa. Eropa guñarã iri ñerire iidiaa. Mari eropa iidiaquerecũ ta Goãmꝯꝯ marire itamuniguicãgꝯ iimi. ĩgꝯ arĩdiro dopa iigꝯ ãhrimi. Eropigꝯ marire iri ñerire iidiarare tarinꝯgacũ itamumi. Marire guñaturacũ iimi. Eropa guñaturarã warã iri ñerire iidiasome. Eropirã árĩpehreri ñeri iidiaquererã iri ñerire tarinꝯgarãca.

¹⁴ Eropirã mꝯꝯ yꝯ mahirã yꝯre peeque. Ne merogã goãmarã wéanirãre ne umupeobiricãque. ¹⁵ Mꝯꝯ õaro pee masirã mꝯꝯ árĩcũ mꝯꝯare werea. Eropirã yꝯ arĩri diaye árĩcũ

masique m̄ua. ¹⁶ Mari gamenere bocat̄ir̄iã Goãm̄ure “Õhaa,” ar̄ira p̄uhr̄u iri vino deco dic̄uripare ihria mari. Eropa ihrir̄ã “Cristo mari ya ñero iira dipuwajare ãḡu di cóãra mera ãḡu mera ár̄ir̄ã ãhraa mari,” ar̄i masia. Eropir̄ã panrure mari Cristo yar̄ã nuha bar̄ã iiaa mari. Eropa bar̄ã “Mari ya ár̄iburire ãḡu d̄up̄u crusague s̄irira mera mari ãḡu mera ár̄ir̄ã yuju d̄up̄u iro dopa ãhraa mari,” ar̄i masia. ¹⁷ Eropir̄ã mari yujuru panrure nuha baro dopa ár̄ipehrer̄ã mari Cristo yar̄ã yuju d̄up̄u iro dopa ãhraa. Eropir̄ã yuju curu ta ãhraa.

¹⁸ Moise dorerire iir̄ã er̄ã iirire guñaque m̄ua. Goãm̄u wihigue er̄ã waibuḡure wejẽ soema Goãm̄ure umupeomor̄ã. Er̄ã eropa wejẽ soera p̄uhr̄u er̄ã soedigare bahama. Eropa bar̄ã yuju curu ta Goãm̄u yar̄ã ár̄ir̄ã ta iima. ¹⁹ Õpa ta ar̄ãḡu goãmar̄ã wéanir̄ã diaye ãhrima, ar̄ãbeaa. Goãmar̄ã marima, ar̄ãa. Eropir̄ã goãmar̄ã wéanir̄ã eropár̄icãr̄ã iima. Eropiro goãmar̄ã wéanir̄ã pohrogue er̄ã apira barip̄u bu gohra ta ãhraa. Iri bari bac̄ũ marire gajiropa iibeaa, ar̄ãa yuh̄u. ²⁰ Yuh̄u eropa ar̄iquereḡu ta iri barire m̄ua bac̄ũ gamebirica. Õpa ãhraa iri: Jesu yar̄ã ár̄ibir̄ã goãmar̄ã wéanir̄ã pohrogue waibuḡure wejẽburire apir̄ã Goãm̄ure umupeobeama. “Gua goãmar̄ãre umupeor̄ã iiaa,” ar̄ir̄ã watẽap̄ure umupeor̄ã iima er̄ã. Er̄ã eropa umupeocũ er̄ã umupeori wihigue er̄ã mera m̄ua batamur̄ã watẽa mera ár̄ir̄ã iro dopa iir̄ã iica m̄ua. M̄ua eropa iicũ tamerare ne gamebeaa. ²¹ Bocat̄ir̄iã vino deco dic̄uripare ihrir̄ã panrure nuha bar̄ã

“Cristo mera āhraa,” arāa mari. Mari eropa iirā árĩrā, watēa yapure ihri, bamasibea mari. Eropirā goāmarā wéanirā pohro apira barire erāre umupeorā mera iri barire batamumasi-bea mari.

²² Mari Opu ĩgu yarāre mahimi. Eropirā eropa barā watēa yarā iro dopa iirā ĩgure guacū iirāca. ĩgu guacū mua turabea ĩgu dipuwaja cāhmotaboro dopa.

Goām ĩgu gameri dihtare iique, arĩ gojañumi Pablo

²³ “Goām ĩdorebirira árĩpehreri iimasiri āhraa yure,” arĩboca mua. Mua iiri ñeri iri árĩbiriquerecū ta irire iirā gajirāre itamubiriboca mua. Eropirā Jesure umupeonemocū iibiriboca mua gajirāre. ²⁴ Mari ya ōaro árĩburi dihtare iibiricāro gahmea. Gajirā ya árĩburi sāre ōaro itamuque mua.

²⁵⁻²⁶ Eropirā gajirāre itamuburire ōpa iique: Bari duarogue barire asūrā warā “¿I bari goāmarā wéanirā pohrogue erā apira bari āhriri?” arĩ, serēpiñabicāque. “¿Ñerire iiri?” arĩrā, serēpiñaboca mua. Goām yare gojarapūgue ōpa āhraa: “I yeba árĩri árĩpehreri Goām ya āhraa,” arĩ gojañuma. Eropirā iri barire “Goām badorebirira bari āhraa,” arĩbiricāque.

²⁷ Jesure umupeobigu mware badoregu ĩgu sihucū wadiarā waque. Eropa warā mware ĩgu ejorire baque. “¿I bari goāmarā wéanirā pohro erā apira bari āhriri?” arĩ serēpiñabita.

²⁸ Gajigu ero árĩgu ōpa arĩbocumi mware: “I bari

goãmarã wéanirãre erã wejẽ apira dihi ãhraa,” arĩbocumi ãgũa. Ìgũ eropa arĩ werecũ iri bari tamerare babita. Mũare eropa arĩ weredigu “Iri barire barã ñerire iirã iica,” arĩ pepibocumi. Ìgũ eropa arĩ pepibiriboro dopa “Babita,” arãa yũhũ mũare. ²⁹ Eropã arĩgũ mũa ya áríburire weregũ iibeaa. Mũare iri barire weredigu ya áríburipũre arĩgũ iiaa mũare. Irire mũa bacũ ãha mũare ãhacũ ãgũ sã babocumi. Ìgũpũ eropa bagũ “Ñero iigũ iiaa,” arĩ pepibocumi. Eropirã “¿Eropa iibocuri ãgũ?” arĩ iri barire babita.

“Babita,” yũ arĩcũ õpa arĩ yũhriboca mũa yũre: “¿Dohpa árírono gajigu gajiropa pepiri arĩrã gũa gamero iimasibiribocuri gũa? ³⁰ Goãmũre gũa ‘Õhaa,’ gũa arĩra pũhrũ gũa bacũ gajigu irire gũa barare gũare weresãmasibeami,” arĩboca mũa yũre. Yũpũ õpa yũhria. ³¹ I árípehrerire mũare yũ wererare weregũ õpa arĩgũ iiaa mũare: Õmũri nũcũ mũa mohmerã, barã, ihrirã, árípehrerire iirã irire Goãmũ ya áríburi dihta iique. Eropirã árípehrerã masa Goãmũre “Õagũ, turagũ ãhrimi,” erã arĩ umupeoboro dopa iique. ³² Ne mũa iiri mera judio masare, judio masa áríbirãre, Goãmũ yarã sãre goroweobiricãque. ³³ Õpa iiaa yũpũ. Masa árípehrerã erã sũaboro dopa iiaa árípehreri mera. Eropigu yũ gamero dopa iiniguicãbeaa yũa. Gajirã masa ya áríburipũre õaro iiaa. Erãre Jesucristore umupeoborore eropa iiaa. Erã ãgũre umupeora pũhrũ erãre peamegue wabonirãre taugũcumi.

11

¹ Cristo gajirã ya árĩburire árĩpehrerire iimi. Eropirã Cristore yu ñhacũdiro dopa ta mua sã yu iidiro dopa ta yare ñhacũque.

Corinto majarã erã gamenererogue nome erã iiborore werepũ

² Mũare yu árĩpehrerire buherare, buhe turi-arare guñapeo waĩcũabu. Eropa guñarã mũare yu arĩrare yu iidore diro dopa ta ii waĩcũabu mua. Eropa iirã õaro iiaa mua. ³ Dohpaguere i sãre mua masicũ gahmea: Árĩpehrerã uma opu Cristo ãhrimi. Eropigu nomeo opu umu ãhrimi. Eropigu Cristo opu, ñgu Pagu Goãmu ãhrimi. ⁴ Mũa Goãmure umupeo gamenerecũ yujugu Goãmure serẽgu dipuru bua serẽgu õaro ñgu opure umupeogu iibeami. Goãmũ yare were-taugu sã dipuru buagu ñgu opure umupeobeami ñgu sã. Eropirã umapu Goãmure serẽã dipu buabiricãporo. ⁵ Eropigo nomeopu dipuru buabigo Goãmure serẽgo igo marapure umupeogo iibeamo. Goãmũ yare werego sã dipuru buabigo eropa ta igo sã umupeobeamo. Eropirã nomepu Goãmure serẽã dipu buaporo. Dipuru buabigo igo poaire erã õaro wũapehodigo iro dopa ta ãhrimo igo. ⁶ Dipuru buadiabigore igo poaire seapehoporo. “Yu poaire sea wũapehodiabeaa. Guhyasĩriboca,” arĩgo igo dipurare buaporo. ⁷ Mũa umapu Goãmũ iro dopa oparã ãhraa. Eropirã Goãmũ õagu, turagu, ñgu arĩricũre ñhmuma erãpu. Eropirã erã dipu buabiricãporo. Nomepu “Gua oparã uma ãhrima,” arĩ ñhmuma. Eropirã erãpu dipure

bʌaporo. ⁸ Goãmʌ ʌmʌre iigu, nomeo ya dʌpʌ mera ʌmʌre iibiriñumi. Nomeopʌre iigu, ʌmʌ ya dʌpʌ mera igore iinñumi. ⁹ Eropigu ʌmʌre iigu sã nomeo yagu árĩbure iibiriñumi. Nomeopʌre iigu ʌmʌ yago árĩbore iinñumi Goãmʌ igore. ¹⁰ Eropirã mʌa Goãmʌre umupeorã gamenerecũ nome dipure bʌaporo anyua sã erã ñhasʌaboro dopa. Eropa bʌarã “ʌma gʌa oparã ãhriima,” arĩ ñhmurã iima. ¹¹⁻¹² Goãmʌ nomeore iigu, ʌmʌ dʌpʌ maja mera iinñumi. Dohpaguere ʌma masa dehyoarã nome dʌpʌgue masa dehyoama. Eropiro ʌmʌ ñgu árĩmʌhtabiricũ nome mariboñuma. Eropi nome maricũ ʌma sã mariboñuma. Eropirã erã Jesu yarã árĩrã, ʌma seyaro nome seyaro árĩmasibeama. Goãmʌpʌ árĩpehrerire apidi árĩmi. I yeba árĩrire i yeba iiburire apidi árĩmi.

¹³ ¿Mʌa basi dohpa pepiri? ¿Nomeo igo dipuru bʌabigo, Goãmʌre igo serẽcũ õhari mʌa pepicũ? Õabeaa. ¹⁴ Eropirã ʌmʌ ñgu poa ñapo ñgu ómacũ ñha masa werewʌama. Árĩpehrerã masa irire masima. ¹⁵ Nomeopʌ poa ñapo ómago árĩcũ õapũrica. Igo poari igo dipuru bʌari iro dopa ta ãhraa. Iri sãre árĩpehrerã masima. ¹⁶ Mʌa mera majagu ire yʌ wererare dʌyasodiagu õpa masiporo ñgu: Irire yʌ arĩdiro dopa ta eropa dihta iiniguicãa mari. Gajirã Jesu yarã sã erã gamenererogue eropa dihta iiniguicãama.

Bocatĩrirã erã barisubu goroweoñorã Corinto majarã

17 Dohpaguere mũare gajinore werebu, “Ōaro iirã āhraa,” arĩbeaa yũhũ mũare. Mũa gamenererã ōaro iirã iibeaa. Eropirã mũa gamenererore goroweorã iiaa. 18 Ōpa arĩ weremuhtagura mũare: Mũa gamenererogue eropa game dũyasorã mũa basi yujurayeri cururi dũca wariayoro mũa. Gajirã yũre irire erã eropa arĩ werecũ “Diaye ta árĩca,” arĩ pepia yũhũ. 19 Eropa dũca warirã ōpa arĩca mũa: “Dũca wari wiriaro gameca marire Jesu yarã gohra árĩrãpũre ĩhmuborore,” arĩca mũa basi. 20 Mũa basi gamenere barã mũa yujuro árĩbirã mari Opũ Jesucristo dorediro dopa diaye ta bocatĩrirã iibeaa. 21 Mũa gamenere barã yujurãyeri mũa seyaro bamũhta, ĩhrimũhta gajirãre corero mariro. Mũa eropiicũ gajirã oaboa wahama. Gajirãpũ merea wahama. 22 ¿Mũa seyaro badiarã duhpirã mũa ya wirigue babeari? ¿Eropirã duhpirã dohpaguere Goãmũ yarã gamenererore “Duhpiburi árĩbeaa,” arĩdiari? ¿Eropirã duhpirã Jesu yarãre mojomorocũrãre bari moorãpũre mũa gũhyaĩuro taricũ iiri? ¿Dohpa arĩ weregũcuri yũhũ mũare? Ōaro iirã iiaa mũa, arĩbeaa yũhũ.

Goãmũ yare bocatĩrirã diaye erã iiburire werepũ Pablo

23 Goãmũ yare bocatĩriburire mari Opũ Jesu weremi yũre. Eropa ĩgũ wererare yũpũ mũare irire werebu. Iri ōpa āhraa: ĩgũre ĩhaturirãre Juda ĩgũ sihurisubu iri ñami ta mari Opũ Jesucristo panrure aĩ, 24 Goãmũre “Ōhaa,” arĩpũ.

Īgu eropa arīra pūhrū iriru panrure nuha, ĭgu buherāre guerepū. Eropa gueregu ōpa arīpū: “I yū dūpū āhraa. Mūa ya árīburire sīrigūca. Yūre mūa guñaburire yūhū dohpague mūare ĭhmuro dopa aī baque,” arīpū Jesu mari Opū. ²⁵ Erā bara pūhrū ĭgu panrure aīdiro dopa ta ihriripare aīgu ōpa arīpū: “Mūa ñeri iirare cóābu sīrigūca. Eropa iigu yū dire cóāgūca. Yū di cóāra mera Goāmū masare ‘Mūa mera amugūra,’ ĭgu arīdiro ojogorocūroca. Ipa dicūrire ihrirā yū di cóārare guñarāca. Ire ihrirā mūa yūre guñaburire yūhū mūare ĭhmudiro dopa iique,” arīpū Jesu. ²⁶ Yū werediro dopa ta iru panrure mūa barā, ihririre ihrirā, Jesu mari Opū mari ya árīburire ĭgu sīrirare ĭhmurā iiaa mūa. Eropa ĭhmuniguirāca mūapū ne ĭgu i yebague ĭgu dujaracūgue.

*Goāmū yare bocatīrimorā ōpa iique, arī go-
jañumi Pablo*

²⁷ Mūa Goāmū yare bocatīrimorā gamenere baha, ihrirā, umupeoro mariro guhyadiaro mariro iirā dipuwajacūrāca. Eropa iirā mari ya árīburire Jesucristo ĭgu dūpūre ĭgu di cóāra sāre wereyaro dopa iirā iiaa mūa. ²⁸⁻²⁹ Ōpa arī guñaro gahmea: “Mari Jesu yarā gamenererā yuju curu yuju dūpū iro dopa āhraa. Mari Jesucristo yarā āhraa,” arī guñaro gahmea. Irire queoro guñabirā, mari iri panrure baha, ihriripare ihrirā queoro iibirā mari dipuwajacūmorā árīrāca. Eropirā mari bocatīriboro core mari árīricūrire guñamūhtaro gahmea ñero iiri arīrā. Eropa iira pūhrū bocatīri ihri bamasia mari.

³⁰ Eropa guña amubirira waja bajarã mũa mera majarã dorecũrã árĩcoma. Erã yujurãyeri tura-birã árĩcoma. Eropirã gajirã erã eropa iira dipuwaja sĩria wañuma. ³¹ Erã baha, ihri-boro core erã árĩricũrre õaro guña, erã ñeri iirire duhunirã, erã ñeri dipuwajare dipuwajacũbiriboñuma. ³² Mari Opũpũ marire ĩgũ yarãre dipuwaja moagũ mari ñeri iirire duhucũ ĩgũ iimi. Jesure gamebirãre ĩgũ dipuwaja moaboro dopa marire dipuwaja moabiriborore eropa iimi. Mari peamegue wabiriborore dohpague marire dipuwaja dabero moami mari Opũ.

³³ Eropirã yũ acawererã, bocatĩrimorã gamenererã, mũa basi corenique. ³⁴ Eropirã mũa mera majarã oaboarã, erã ya wihigue bamũhtaporo. Eropirã bocatĩrimorã õaro gamenere baque mũa ñero dipuwajacũrã wabiriborore. Gajinore werediarabũ mũaare. Pũhrũ yũ basi ejagũ mũaare weregura irire.

12

Goãmũ ya árĩburire mari mohmeburire apigũ marire irire iimasicũ iimi Espĩritu Santo, arĩ gojañumi Pablo

¹ Yũ acawererã, õpa mũaare weregũ ire mũaare masicũ gahmea. Goãmũ ya árĩburire mari mohmeburire apigũ marire árĩpehrerãre irire iimasicũ iimi Espĩritu Santo.

² Mũa Jesu yarã árĩnibirã gajiropa árĩri buherire pee nũrũrã árĩrã, mũapũ goãmarã wéanirãre umupeoyoro. Noho mũa bocarãre wereniguibirãre umupeoyoro. Irire masia mũa.

³ Eropa árĩnirã mũa árĩcũ dohpaguere õpa arĩ werediaca mũaare. Espĩritu Santo itamuri mera wereniguirã “Jesu ñero waporu,” ne arĩmasibeama. Eropirã Espĩritu Santo itamuri mariro wereniguirãpũ “Jesu árĩpehrerã wecague opu mari Opu ãhrimi,” arĩmasibeama.

⁴ Goãmũ ya árĩburire mohmemasiburi baja ãhraa. Irire marire iimasicũ iigupũ yujugũ ta ãhrimi. Ĩgu Espĩritu Santo ãhrimi. ⁵ Eropiro Goãmũ ya árĩburire iimasiri mera mari mohmeburi baja ãhraa. Irire mari iiburire doregu yujugũ ta mari Opu Jesu ãhrimi. ⁶ Mari ĩgu yarã ĩgu ya árĩburire iimasiri mera mari mohmeri yujuropa ta árĩbeaa. Iri mohmeri õaro wacũ iigu yujugũ ta Goãmũ ãhrimi. ⁷ Espĩritu Santo marire Jesu yarã nũcare mari iimasiburire apigu Goãmũ turarire ĩhmugũ iimi. Opa ta iimi ĩgu Jesu yarãre árĩpehrerã mari õaro mohmeboru dopa. ⁸ Yujurãyerire õaro masiri mera werecũ iimi Espĩritu Santo ta. Eropigu gajirãre Goãmũ yare õaro buhecũ iimi ĩgu Espĩritu Santo. ⁹ Eropigu gajirãre “Mari Goãmũ mera õaro iimasia,” arĩ Goãmũre guñaturacũ iimi Espĩritu Santo ta. Eropa iigu gajirãre turarire Espĩritu Santo ta ohomi ĩgu. Iri turarire ĩgu ocũ erãpũ dorecurãre õarã wacũ iima. Espĩritu Santo yujugũ ta árĩgu iri turarire ohomi. ¹⁰ Eropigu ĩgu gajirãre deyoru moarire iimasicũ iimi ĩgu. Eropa iigu Goãmũ yare õaro weretaumasicũ iimi ĩgu gajirãre. Eropa iigu gajirã Jesu yarãre buherire õaro beyemasicũ iimi ĩgu. Eropa masirã watĩ ya buheri árĩcũ masima erã. Espĩritu Santo gohra

ya iri buheri árĩcũ sãre masima erã. Eropigũ gajirãre erã peeyamarirã yare wereniguĩmasicũ iimi ĩgũ. Eropigũ peeyamarirã yare erã wereniguicũ gajirãre weretaumasicũ iimi. ¹¹ Iri árĩpehrerire iimasirire apigũ ta Espĩritu Santo ta yujugũ ta àhrimi. ĩgũ gamero dopa ta marire yujurãyerire mari mohmeburire apĩmi.

Cristo yarã árĩrã yuju curu ta àhraa mari, arĩ gojañumi Pablo

¹² Werenigui queori mera mũare weregũra: Mari dũpũ yuju dũpũ árĩquerecũ ta, mojotori, cuiiri, guburi, gamiri, iri tamera baja àhraa mari dũpũre árĩri. Eropa àhraa mari Cristo yarã. Bajarã árĩquererã ta yuju dũpũ iro dopa ta yuju curu ta àhraa ĩgũ mera. ¹³ Eropirã Cristo yarã árĩrã ĩgũ dũpũ iro dopa yuju curu ta àhraa mari. Judio masa, judio masa árĩbirã, pohro majarã, pohro majarã árĩbirã, baja cururi árĩquererã ta yujugũ árĩgũ ĩgũ dũpũ iro dopa yuju curu ta àhraa mari. Espĩritu Santo yujugũ ta árĩgũ ĩgũ turari mera waĩyesũnirã marire yuju curu Cristo yarã árĩcũ iimi. Eropirã mari árĩpehrerã yujugũ Espĩritu Santore opaa Cristo ya curu majarã árĩrã.

Eropirã mari Cristo yarã yuju dũpũ iro dopa àhraa. ¹⁴ Mari dũpũ yuju dũpũ árĩquerecũ ta mojotori, cuiiri, guburi, gamiri iri mari dũpũ árĩri baja àhraa. ¹⁵ Mũ guburo wereniguiiri guburo árĩro õpa arĩboya mũre gajiropa arĩro: “Mũ mojoto árĩbeaa yũhũ. Eropiro mũ dũpũ maja árĩbeaa yũhũ,” arĩboya. Mũ guburo eropa árĩquerero ta mũ dũpũ maja árĩro ta iiaa. ¹⁶ Mũ

gamiro wereniguiri gamiro árĩro õpa arĩboya mure: “Mũ cuiru árĩbeaa yũhũ. Eropiro mũ dũpũ majaru árĩbeaa yũhũ,” arĩboya. Mũ gamiro eropa arĩquerero ta mũ dũpũ maja gamiro árĩro ta iiaa. ¹⁷ ¿Mari dũpũ cuiru dihta árĩcũ dohpa peebocuri mari? Masiya mara. ¿Eropirã mari dũpũ gamiro dihta árĩcũ dohpa ii wĩji pepibocuri mari? Masiya mara. ¹⁸ Eropa árĩbeaa mari dũpũ. Õpa ãhraa. Mari dũpũ árĩrinore árĩpeherrerire Goãmũ ãgũ gamero dopa ta apidi árĩmi mari dũpũre. ¹⁹ ¿Mari dũpũ árĩri maricũ dohpa waboyuri mari dũpũ? Mariboya. ²⁰ Mari dũpũ õpa ãhraa: Yuju dũpũ árĩquerecũ ta mari dũpũ árĩri baja ãhraa. Eropa ta mari Jesu yarã yuju dũpũ iro dopa árĩquererã bajarã ãhraa mari basi game itamumorã.

²¹ Eropiro mũ cuirupũ mũ mojtore “Mũ itamucũ gamebeaa,” arĩmasibeaa. Eropiro mũ dipuru mũ guburire “Mũ itamucũ gamebeaa,” arĩmasibeaa. ²² Gaji mari dũpũ árĩrire “Bu árĩñariri ãhraa,” mari arĩripũre upũtũ gahmea mari. ²³ Eropirã gaji mari dũpũ árĩrire “Bu árĩñariri ãhraa,” arĩ pepia. Eropirã irire õaro deyoporo arĩrã õaro ahmua. Eropirã gaji mari dũpũ árĩrire mari gũhyasĩrisãrire õaro ahmua õaro árĩboro dopa. ²⁴ Gaji mari dũpũ árĩrire mata õari deyoripũre eropa amubeaa mari. Goãmũ mari dũpũ árĩri yujuũe gajiũere gamebircũ iibiridi árĩmi. ãgũ mari dũpũ árĩrire árĩpeherrerire õaro amudigũ árĩmi yuju dũpũ õaro dũpũcũburire. Eropa iigũ “Bu árĩñariri ãhraa,” mari arĩripũre mari õaro gamecũ

iimi. Eropa ta ne yujugure Jesu yagure “Bu árĩgu ãhrimi,” arĩmasibea mari. ²⁵ Eropa ta árĩdoredi árĩmi Goãmũ mari dũpũ árĩri yujuro mera iri basi game itamuboro dopa. ²⁶ Mari dũpũ árĩri yujuñe ñero taricũ gajĩ mari dũpũ árĩri sã ñero taria. Eropiro mari dũpũ árĩri yujuñe õaro árĩcũ mari dũpũ árĩpehrero õaro pepia.

²⁷ Eropa arĩgu õpa arĩdiagũ iiaa mũare: Mũapũ Cristo ãgu dũpũ iro dopa árĩrã yuju curu ta ãhraa. Eropirã árĩpehrerã mũa ãgu dũpũ árĩri iro dopa ãhraa ãgu yarã árĩrã. ²⁸ Eropigũ Jesu yarã gamenererã watope mari game itamuburire apidigũ árĩmi Goãmũ marire. Õpa apipũ ãgu marire: Yujurãyeri gũare buhedoregũ Cristo apimũhtadigũ árĩmi. Ero pũhrũ gajirãre ãgu yare weretaumorãre apidi árĩmi. Ero pũhrũ gajirãre Jesu yarãre buhemorãre apidi árĩmi. Eropigũ gajirãre deyoro moarire iimorãre, gajirãre dorecũrãre erã taricũ iimorãre, erã pũhrũ gajirãre masare itamumorãre, gajirãre oparã árĩmorãre apidi árĩmi. Ero ojogoro peeyamarirã yare wereniguimorãre apidigũ árĩmi marire. ²⁹ Eropa ãgu apicũ árĩpehrerã yujuropa iimorã árĩbeaa mari. Mari árĩpehrerã Jesucristo yare buhedore ãgu apinirã árĩbeaa mari. Eropirã Goãmũ ãgu yare weretaurã mari árĩpehrerã árĩbeaa. Eropirã árĩpehrerã masare buherã árĩbeaa. Eropirã mari árĩpehrerã deyoro moarire iimasirã árĩbeaa mari. ³⁰ Eropirã mari árĩpehrerã dorecũrãre taumasirã árĩbeaa

mari. Eropirã mari árĩpehrerã peeyamarirã yare wereniguimasimorã árĩbeaa. Eropirã gajirã erã wereniguirire weretaumasimorã mari árĩpehrerã árĩbeaa. ³¹ Eropirã Goãmũ ya árĩburire mohmemasiburiñere gamerã õaripure turaro gameque mũa. Eropigũ árĩpehreri yũ arĩra tauro õaro mũa iiburire dohpaguere weregura yũhũ.

13

Gajirãre erã õaro mahiburire, umupeoburire wereñumi Pablo

¹ Peeyamarirã yare masa ya wereniguirire, anyua ya sãre wereniguimasiquererã ta gajirãre mahibirã, duhpimorã árĩbiriboya mari. Eropiro mari wereniguiri sã eropa busũmaacãboaya mari gajirãre mahibirã árĩrã. ² Goãmũ yare õaro weremũhtamasiquererã ta gajirãre mahibirã bu árĩmaacãrã árĩboya mari. Eropirã masa erã masibirirare Goãmũ yare árĩpehreri masiri masipehoquererã ta gajirãre mahibirã, bu árĩmaacãrã árĩboya mari. Goãmũre õaro umupeotariri mera utãgũ “Gajipũgue waporo,” arĩrã wadoremasicquererã, mari gajirãre mari mahibirã bu árĩrã árĩboya. ³ Mari yare árĩpehrerire mojomorocũrãre oquerecũ ta erãre mahibiricũ iri mari ora duhpiburi árĩbiriboya. Eropirã Goãmũ ya árĩburire mari iira dipuwaja mari dupũre gajirãpũ soequerecũ ta, gajirãre mari mahibiricũ iri duhpiburi árĩbiriboya.

4 Gajirãre mahirã mata guabeaa erã mera. Erãre mahirã õaro iiaa. Eropirã gajirãre mahirã erã marire opanemocũ ìhaturibeaa. Eropirã mari mahigũ mera árĩrã “Mũ tauro árĩgũ ãhraa yũhũ,” arĩrã iibeaa mari. Gajirãre mahirã, “Erãre masitarinũgaa,” arĩ pepibeaa. 5 Eropirã gajirãre mahirã erãre umupeori mera queoro iiaa mari. Gajirãre mahirã mari ya árĩburi dihtare guñabeaa. Erã ya õaro árĩburi sãre guñaa. Eropirã erãre mahirã disitĩri wereniguibeaa mari. Eropirã marire erã ñero iicũ sãre erã mera guawajabeaa mari. 6 Gajirãre mahirã erã ñero iirire mucubiribeaa mari. Diaye majapũre erã iicũ ãarã bũrigã mucubiria erã mera. 7 Gajirãre mahirã erã ñeri iicũ gajirãre ne quere moabeaa. Eropirã gajirãpũ erãre erã werewũacũ peequererã ta irire peediabeaa mari. Õari dihtare peediaa mari. Gajirãre mahirã “Õarire iirãcoma,” arĩ cohrea mari erãre. Gajirãre mahirã erã iira mera mari ñero tariquererã ta erãre mahi duhusome mari.

8 Gajirãre game mahiri ne pehresome. Goãmũ yare weretauripũ pũhrũ duhpiburi árĩsome. Peeyamarirã ya wereniguiiri sã pehrea waroca. Goãmũ yare masitariri wajamariroca pũhrũgue. Mari masipehora pũhrũgue duhpiburi gohra árĩsome iri. 9 Dohpaguere Goãmũ yare mari merogã masia. Eropirã mari ãgũ yare wererã mari merogã weremasia. 10 Pũhrũgue ta mari masipehorãca. Eropiro mari merogã masira duhpiburi árĩsome. Irisubugue masipehorãca.

11 Iri õpa ãhraa: Majigũ árĩgũ majigũ dopa

wereniguiribũ yũhũ. Eropigũ majigugã dopa pepiribũ. Eropigũ bugũ wagũ majigũ iro dopa árĩrare duhucãbũ. Eropa ta pũhrũguere mari dohpaguere merogã masirare duhura pũhrũ masipehorãca. ¹² Diuru õaro masũre deyocũ iibiro dopa ta dohpaguere õaro masipehonibea dohpa mari. Pũhrũ Goãmũre mari õaro ãhamasirãgue mari masipehorãca. Dohpaguere mari merogã dihta masia dohpa. Goãmũ marire ãgu masipehodiropa ta pũhrũ mari sã õaro masipehorãca.

¹³ Eropirã dohpaguere mari iimasiburi ãhrene dujaroca. Goãmũre “Diaye ta árĩgu ãhrimi,” arĩ umupeoniguirãca. Eropirã marire ãgu mera õaro árĩniguiburire mucubiri coreniguirãca. Eropirã gajirãre game mahiniguirãca. Goãmũre umupeori, ãgu mera árĩborore mucubiri coreri tauro ãhraa game mahiripũ.

14

Peeyamarirã yare wereniguirire wereñumi Pablo

¹ Eropirã gajirãre game mahirã árĩque mũa. Eropirã Goãmũ ya árĩburire mũa mohmemasiburire Espĩritu Santo ãgu apirare turaro gameque. Goãmũ yare mũa weremasiburi tamereare burigã gameque mũa. ² Peeyamarirã yare wereniguigũ Goãmũ dihta peeborore werenigui. Eropa arĩ wereniguigũ masa peeborore wereniguigũ iibeami ãgu. ãgu eropa arĩ wereniguicũ peerã masapũ ne peebeama ãgure. Masa erã masibiririre Espĩritu Santo ãgu turari

mera wereniguigu iimi ĩgu. ³ Goãmu yare weretaugupu masapu peeburire weremi. Eropa weregu ĩgu masare itamugu iimi ĩgu. Eropigu erãre Jesucristore umupeonemocũ iimi. Eropigu ĩgu erã ñero taricũ ĩgu erãre ôaro sĭporãcucũ iimi. ⁴ Peeyamarirã yare wereniguigu ĩgu basi dihtare Jesucristore umupeonemocũ iimi. Gajirãre Jesucristore umupeonemocũ iibeami. Goãmu yare weretaugupu gajirãre Jesu yarã gamenererãre Jesucristore umupeonemocũ itamumi ĩgu.

⁵ Peeyamarirã yare árĭpehrerã mua wereniguicũ ôaboya yu pepicũ. Eropa árĭquerecũ ta Goãmu yare mua weretaucũ tamerare turaro gahmea. Goãmu yare weretaugupu peeyamarirã yare wereniguigu tauro ôagu âhrimi. Eropa árĭquerecũ ta peeyamarirã yare wereniguigu ĩgu wereniguirire gajigu ĩgu weretaucũ ĩgu sã ôagu dujami. ĩgu wereniguirire weretaugu Jesu yarã gamenererãre Jesucristore umupeonemocũ iimi.

⁶ Eropigu, yu acawererã, yuhũ mua pohrogue peeyamarirã yare wereniguigu wagu mũare itamumasibiriboya yuhũ. Goãmu ĩgu yure wererare weregu itamua. ĩgu yare Espĭritu Santo yure masicũ iirare buhegu mũare itamugu iiaa.

⁷ Peeyamarirã ya wereniguigu ĩgu wereniguiriri mari peebiro ôpa iro dopa âhraa. Tarasure purirã, mari buamutêriñere irire mari queoro iibiricũ, iri bayarire gajirãre masima masiya mara. ⁸ Eropigu cornetare purigu surara árĭgu

erã gamewejẽboro corere queoro ĩḡu puribiricũ gajirã surarapũ masisome erã gamewejẽboro gamenererore. Eropirã erã gamewejẽboro core erã wejẽburi mojore amuyubirã áhřima erã. ⁹ Eropa ta mũa sã peeyamarirã yare wereniguicũ peerã gajirã irire peebeama. Eropa peebiricũ mũa wereniguiri duhpiburi árĩbeaa erãre. ¹⁰ I yebare baja wereniguiri árĩca. Eropirã irire wereniguirã erã basi erã eropa wereniguirire õaro peema. ¹¹ ĩḡu ya wereniguirire yũ peebiricũ ĩagũ irire wereniguigũpũ “Gajirã yare wereniguimi,” arĩ pepicumĩ yũre. Eropigũ yũ sã eropa ta arĩ pepica ĩḡũre. ¹² Eropirã mũa peeyamarirã yare wereniguirã, Espĩritu Santo ĩḡu yare mohmemasi apira mera turaro mohmediaraa mũa. Irire eropa iidiarã Jesu yarã gamenererãre õaro itamuburipũre burigã mohmediaque mũa.

¹³ Eropigũ peeyamarirã yare wereniguigũ “Yũ wereniguirire gajirãre õaro weretaumasiburire itamuque yũre,” Goãmũre arĩ serẽporo ĩḡu. ¹⁴ Peeyamarirã ya mera Goãmũre serẽḡu yũ pepiri mera serẽḡu ĩiaa. Eropa serẽḡu yũ pepirire masibigũ yũ wereniguirire masibeaa. Eropa ĩigũ gajirãre itamubeaa yũhũ. ¹⁵ Ire masirã, õpa iirãca mari: Espĩritu Santo ĩḡu turari mera peeyamarirã ya mera Goãmũre serẽrãca. Eropirã gajisubu õaro masi pepirã gajirã erã õaro peeoro dopa erã ya mera Goãmũre serẽrã iri sãre serẽrãca mari. Espĩritu Santo ĩḡu turari mera peeyamarirã ya mera Goãmũ yare bayarãca. Eropirã gajisubu õaro masi pepi gajirã erã õaro peeoro dopa

erã ya mera Goãmure bayarãca. ¹⁶ Mari eropa iibiricũ peeyamarirã ya mera werenigu-irã Espíritu Santo ïgu turari mera Goãmure, “Ōagu turagu àhrimi,” mari arĩquerecũ ta gajirã ne peebeama. Erã eropa peebirã “Diaye ta àhraa,” arĩmasibeama. ¹⁷ Peeyamarirã ya mera Goãmure “Ōhaa,” arĩmasia mari. Mari eropa arĩri òaro árĩquerecũ ta gajirã peebeama. Eropirã erãre Jesucristore umupeonemocũ itamubeaa mari. ¹⁸ Árĩpehrerã maa tauro yurũ peeyamarirã yare wereniguia. Eropigu Goãmũ yure eropa wereniguimasigu ïgu iicũ ïgure “Ōhaa,” arãa yuhũ. ¹⁹ Eropa wereniguigurũ yũ árĩquerecũ Jesu yarã gamenererã watope peeyamarropa peebirã “Diaye ta àirã ya mera yoari boje yũ wereniguiquerecũ duhpiburi árĩbeaa erãre. Yuhũ masa erã òaro peemasiboro dopa buhegu merogã yũ buhequerecũ ta iri tamera òapũrica erãre.

²⁰ Yũ acawererã, majirãgã pee masibirãgã iro dopa árĩbircãque maa. Murã erã pee masirã árĩro dopa árĩque maa. Eropirã ne masa dehyoarã erã ñeri iirire erã masibiro dopa ta árĩque maa. ²¹ Goãmũ yare erã gojarapũ òpa àhraa Goãmũ wereniguire: “Gajirã ya queo wererãre oã masare yahare weredoregura. Eropigu gaji yeba majarã masare òarire yahare weredoregura oã masare. Yũ eropa weredorequerecũ ta erã yure peesome yũ wererire,” arĩmi Goãmũ mari Opũ, àhraa Goãmũ yare erã gojarapũgue. ²² Peeyamarirã yare wereniguri Goãmure umupeobirãre erãre

ĩhmuri āhraa. Eropiro peeyamarirā yare wereniguiri Jesu yarāpũre Goāmũ turarire ĩhmuri ārĩbeaa. Eropiro Goāmũ yare wereripũ Jesure gamebirāre Goāmũ turarire ĩhmuri ārĩbeaa. Goāmũ yare wereripũ Jesu yarāpũre Goāmũ turarire ĩhmuri āhraa. ²³ Eropirā mũa Jesu yarā gamenerecũ, peeyamarirā yare mũa ārĩpehrerā wereniguicũ, Goāmũ yare masibirā gajirā Jesure umupeobirā sã ñajari peebocoma. Mũa eropa wereniguicũ peerā, erā mũare “Cue, goroweorā wahama,” arĩbocoma erā. ²⁴ Árĩpehrerā mũa Goāmũ yare mũa werecũ tamera Goāmũ yare masibigũ, Jesure umupeobigũ sã ñajari peegũ, ĩgũ ñero iirare masigũcumi ĩgũ. Eropigũ ĩgũ ñeri iirare bajawerebocumi ĩgũ. ²⁵ Eropigũ ĩgũ árĩricũrĩre ĩgũ pepiri sãre guñagũcumi ĩgũ. Eropigũ mereja Goãmũre “Yũ opũ āhrimi,” arĩgũ umupeogũcumi. Eropigũ “Goāmũ diaye ta mũa mera āhrimi,” arĩgũcumi ĩgũ mũare Goāmũ yare werecũ peegũ.

Mũa gamenererā õaro iique goroweorõ mariro, arĩ gojañumi Pablo

²⁶ Eropigũ, yũ acawererā, mũare ire arĩgũ iiaa: Mũa gamenerecũ yujurāyeri mũa mera majarā Goāmũ yare bayadiama. Eropirā mũa gajirā buhediaa. Eropirā gajirā Goāmũ mũare ĩgũ wererare werediaa. Eropirā mũa gajirā peeyamarirā yare wereniguidiaa. Eropirā mũa gajirā iri wereniguirire weretaudiaa. Mũa eropa iirā gajirāre erā Jesucristore umupeonemoboro dopa irire iique. ²⁷ Eropirā peeyamarirā yare

mua wereniguirã mua perã o Ɂrerã, erã nucu ta wereniguique mua gamenererisubu. Eropirã yujurãyeri wereniguique. Mua eropa wereniguiçã, yujugu mua mera majagu mua wereniguirire gajirãre weretauporo. ²⁸ Mua wereniguirire weretaubu maricã mua gamenererogue peeyamarirã yare wereniguibiricãque. Eropirã mua seyaro peeyamarirã yare Goãmũ mera wereniguique. ²⁹ Eropirã Goãmũ yare weredarã perã o Ɂrerã iripêta wereque mua. Mua eropa werecũ gajirã muare peerã mua wererire Goãmũ ya árĩcũ òaro masiporo. Eropirã Goãmũ ya árĩbiricũ sãre òaro masiporo. ³⁰ Eropigu Espíritu Santo Goãmũ yare gajigũre ero doagũre ãgũre wereri ocũ, ãgu sã Jesu yarãre werediami. ãgu werediacũ ãha Goãmũ yare weremuhtagupũ werenigui duhuporo. ³¹ Eropirã mua árĩpehrerã Goãmũ yare wererã, yujurãyeri wereque mua árĩpehrerã gajirã erã òaro peeboro dopa, erã òaro mucubiriboro dopaa. ³² Eropirã Goãmũ yare wererã árĩrã, òaro pee masirã, òaro peeñanugu wereniguirã árĩque. ³³ Goãmũ ãgu yarã erã gamenererogue erã game wisicũ gamebeami ãgu. Goroweoro mariro erã òaro árĩcũ gahmemi ãgu. Eropirã òaro iique mua árĩpehrerogue Jesu yarã gamenererã.

³⁴ Árĩpehrero Jesu yarã gamenererore nomere wereniguibiricãro gahmea. Erã nomere maripũ wereniguidorebeaa. Goãmũ yare erã gojarapũ sã arĩro dopa ta nomere muare òaro yũhrirã nome arĩro gahmea. Eropirã mua gamenererore nome masare werebiricãporo. ³⁵ Jesu yarã erã

gamenererore nome erã wereniguicũ õabeaa. Eropigo gajinore masidiago nomeo igo ya wihigue ta igo marapure serëpiporo.

³⁶ Ire yu wereburi õaro masique mua. Goãmu yare weremuhtarã árĩbeaa mua. Eropirã igu yare peenirã mua dihta árĩbeaa. Gajirã sã igu ya buherire opama. ³⁷ Mua mera majagu “Yu tamera Goãmu yare weregu ahraa,” arĩ pepibocumi. Eropa arĩ pepigu i yu muare gojarare “Goãmu doreri ta ahraa,” arĩ masiporo igu. Eropigu gajigu, “Espíritu Santo iimasiburire igu apirare õaro opaa yuhũ,” arĩ pepibocumi. Eropa arĩ pepigu igu sã i yu muare gojarare “Goãmu ya doreri ta ahraa,” arĩ masiporo. ³⁸ Irire igu masidiabiricũ yu gojarare “Diaye árĩbeaa,” igu arĩcũ igure duhucãque. Peebircãque igure.

³⁹ Eropirã yu acawererã, Goãmu yare weremasiburire burigã gameque mua. Eropirã mua mera majarã mua gamenererogue peeyamarirã ya erã wereniguidiacũ, “Wereniguibircãque,” arĩbircãque erãre. ⁴⁰ Eropa iirã õaro iique. Eropirã gamenererã õaro game, goroweoro mariro iique mua.

15

Cristo igu masa mũriarare werepu Pablo

¹ Dohpaguere yu acawererã, õari buherire yuhũ muare wererare muare guñacũ iidica. Iri buherire õaro peebu mua. Eropa peerã iri buherire umupeonijarã õaro ahraa mua. ² Mua eropa umupeocũ irire mua cóãbiricũ Cristo muare peamegue wabonirãre taugucumi. Mua

eropa peera pũhrũ Cristo yare mũa duhucãcũ iri mũa peera duhpiburi árĩbiriboya.

³ Ōpa arĩ weremũhtagũra mũare. Bu gohra árĩbeaa. Mũare buhegũ yũre Cristo ãgũ wererare ōpa arĩ werebũ: Goãmũ yare erã arĩ gojayudiro dopa ta mari ñeri wajare Cristo sĩripũ. ⁴ Eropigũ Goãmũ yare erã arĩ gojayudiro dopa ta Cristo ãgũ sĩrira pũhrũ gajirã ãgũre erã yaara pũhrũ Ʃhrenũ waboro ãgũ masa mũariapũ. ⁵ ãgũ eropa masa mũariara pũhrũ Pedrore dehyoapũ. ãgũ eropa dehyoara pũhrũ ãgũ buherãre doce mera majarãre dehyoapũ daja. ⁶ Erãre dehyoara pũhrũre yujusubu ta quinientos weca árĩrãre ãgũ yarãre dehyoapũ daja. Gajirã ãgũre ãanirã sĩrituhañorã. Gajirã ãgũ ãanirã bajarã erã mera majarã árĩnirã dohpaguere árĩnima. ⁷ Pũhrũ Cristo Santiagore dehyoapũ daja. Eropa ãgũ dehyoara pũhrũ árĩpehrerã ãgũ buhedore apinirãre dehyoapũ daja.

⁸ Árĩpehrerã gajirãre ãgũ dehyoara pũhrũ yũ sãre dehyoami daja. Majigũgã queoro masa deyobigũgã ãgũ masa dehyoanũrusiadiro dopa ta yũ sã Jesure umupeo nũrusiagũ ãhraa. Yũ eropa árĩcũ erã pũhrũre dehyoami Jesu yũ sãre. Yũre ta ãgũ dehyoatumi pare. ⁹ Ero coregue Jesu yarãre ñero iiribũ. Eropa iidigũ árĩgũ gajirã Jesu ãgũ apinirã árĩpehrerã erã docague gohra ãhraa yũhũ. Eropigũ dohpague sãre Jesu ãgũ buhedore ãgũ apibodigũ árĩbiriribũ yũhũ. ¹⁰ Eropa árĩqueregũ ta Goãmũ ãgũ yũre mahicũ dohpaguere Jesu ãgũ apidigũ ãhraa yũ sã. Eropigũ ãgũ yũre mahicũ dohpaguere ãgũ

gamerire iipehoa. Eropigu ĩgu yure mahicũ ĩgu yagu eropa árĩcãgu iibea. Árĩpehrerã gajirã ĩgu apinirã tauro yurpu turaro mohmeabũ. Eropa mohmegu yu gamero iri mohmerire iibirabũ. Goãmu yure mahigu yure itamuami. ¹¹ Yuhu mũare õari buherire buhegu yu árĩcũ erã mũare buherã árĩcũ sãre yujuropa aãhraa. Guapu ire buherã árĩquererã ta bu gohra árĩrã iiaa. Gua buheripu bu árĩri árĩbeaa. Eropirã mũapu i buherire õaro peeabũ.

Sĩrinirã mũra erã masa mũriaborore werepu Pablo

¹² Cristo ĩgu sĩrira puhru ĩgu masa mũriarare gua buhequerecũ “Sĩrinirã mũra ne masa mũriabeama,” arĩma mũa mera majarã yu-jurãyeri. ¿Dohpa arĩrono eropa arĩri erã irire? ¹³ Őpa masiporo erã. Sĩrinirã mũrare Goãmu masa mũriacũ iibigu Cristo sãre ne masa mũriacũ iibiriboñumi. ¹⁴ Eropigu Cristo ĩgu masa mũriabiricũ õari buherire gua werera ne waja mariboya. Mũa ĩgure umupeori sã waja mariboya. ¹⁵ Masa mũriari maricũ guapu Goãmu yare wererã guyarã iiboya. Sĩrinirã mũra erã masa mũriabiricũ Goãmuru Cristore masa mũriacũ iibiriboñumi. ĩgu eropa iibiricũ gua “Goãmu Cristore masa mũriacũ ipu,” arĩrã guyarã iiboya. ¹⁶ Sĩrinirã mũrare Goãmu masubigu, Cristo sãre ĩgu masubiriboñumi. ¹⁷ Eropiro Cristo ĩgu masa mũriabiricũ ĩgure mũa umupeori waja mariboya. Eropiro mũa ñeri dipuwajacurã árĩboya dohpa peamegue wamorã. ¹⁸ Masa mũriariñe maricũ Cristo yarã

mura sīrimuhtanirã mura peamegue wamorã árīboñuma. ¹⁹ Cristore mari umupeora pũhrũ mari sīrirãgue mari masa mũriamasibirimorã árĩrã árĩpehrerã masa tauro mojomorocurã árĩboya maripũ. Eropirã ĩgũre umupeorã bu gohra árĩrire umupeorã iiboya mari.

²⁰ Eropa árĩbeaa. Diaye ta Goãmũ Cristore õaro masa mũriacũ iicãdi árĩmi. Cristo ĩgũ masa mũriara pũhrũ mari sã sīrirãgue masa mũriamorã ta ãhraa. ĩgũ eropa masa mũriagũ, Cristo masa mũria gubuyecũñumi marire. ²¹ Őpa ta ãhraa i: Adán masũ árĩmuhtadigũ ĩgũ ñerire iinũgara pũhrũ masa sīrinũgañuma. Eropigũ gajigũ masũ Jesucristo õarire ĩgũ iira pũhrũ sīrinirã mura masa mũriamasima. ²² Adán yarã árĩnũrusiarãgue mari árĩpehrerã sīrirãca. Eropa ta Cristo yarã mari árĩcũ mari sīrira pũhrũ marire masa mũriacũ iigũcumi Goãmũ. ²³ Yujurãyeri cururi marire Goãmũ sīhurisubu masa mũriarãca. Cristo marire árĩmuhtadigũ masa mũriamuhtapũ. Pũhrũ ĩgũ i yebague dujaricũ ĩgũ yarã sã masa mũriarãcoma. ²⁴ Irisubu ta i mũmũ pehrerinũ árĩroca. Eropigũ árĩpehrerã ñerã oparãre, dorerãre, turarãre Cristo cóagũcumi. ĩgũ eropa iira pũhrũ árĩpehrerã weca opũ ĩgũ árĩrare wiagũcumi Goãmũre mari Pagũre. ²⁵ ĩgũ wiaboro core mari Pagũ Cristore ĩhaturirãre ĩgũ tarinũgapehoboro core Cristo tamera árĩpehrerã weca opũ árĩgũcumi. Eropa iibu ta árĩro gahmea ĩgũre. ²⁶ ĩgũre ĩhaturirãre ĩgũ cóãra pũhrũ sīririñe sãre pehrecũ iigũcumi

ĩgu. ²⁷ Goãmũ yare gojarapũgue õpa ãhraa: “Árĩpehrerã weca dorebure apipũ Goãmũ Cristore. Árĩpehreri sãre apipũ ĩgũre.” Eropa ta arãa Goãmũ yare erã gojarapũgue. “Árĩpehrerã weca dorebure apipũ Goãmũ Cristore,” arĩ gojagu, “Goãmũ weca doregu Cristo ãhrimi ĩgu,” arĩdiabiriñumi. Goãmũpũ Cristore eropa apiñumi. ²⁸ Árĩpehrero Goãmũre ĩhaturirãre ĩgu cóãra pũhrũ árĩpehrerã weca doregu Cristo Goãmũ magũ ĩgu árĩtuhagu ĩgu opũ árĩrare Goãmũre ĩgũre apidigapũre wiagucumi. Eropiigucumi “Goãmũpũ árĩpehrerã weca opũ árĩpehreri opũ gohra ãhrimi,” árĩpehrero árĩpehrerã arĩmasiboro dopa.

²⁹ “Sĩrinirã masa mũriasome,” arĩma gajirã. ¿Erã arĩri diaye árĩcũ duhpimorã gajirã masa sĩrinirã mũra ya árĩburire erã waĩyebasanirã ãhriri mũa pepicũ? Sĩrinirã mũra masa mũriabiricũ erã ya árĩburire gajirã waĩyebasara duhpiburi árĩbiriboya.

³⁰ Guapũ gua buheri dipuwaja umũri nũcu gajirã guare erã ñero iidiacũ guhya ãhraa gua sãre. Guare eropa guhyaquerecũ ta masa mũriari árĩcũ masirã eropa buheniguicãa gua.

³¹ Mari Opũ Jesucristo yarã mũa árĩcũ ĩgũre umupeonemorã mũa wacũ yũpũ turaro mucubiri pepia yũhũ mũare. Iri diaye ta ãhraa. Eropiũ “Yũre noho erã gamerĩnũ wejẽmaja guhya ãhrima,” yũ arĩcũ iri sã diaye ta ãhraa.

³² Efeso majarã guarã õari buherire yũ buhera waja yũre pama. Masa mũriariñe maricũ Jesu yagu yũ árĩbiricũ, yũ ñero tarira waja duhpiburi

árĩbiriboya. Sĩrinirã mura erã masa muriabiricũ õpa arĩboya mari: “Puhruñari sĩrirãca. Dohpa wasome mari. Eropirã bania, ihrirã, mari gamero dopa iirã,” arĩboya mari.

³³ Eropa arĩ guyarire pepibiricãque mua. “Ñerãre wapicurã, õarire mua iirare cãdijirãca mua,” arĩma masa. Iri diaye ta ãhraa. ³⁴ Oarire pepirã arĩque mua. Eropirã õarire iirã arĩque daja. Eropirã ñerire iinemobiricãque daja. Gajirã mua mera majarã ne Goãmure masibeama. Mua guhyasĩriburire mware eropa arãa.

*Sĩrinirã mura erã masa muriaborore weren-
emopu Pablo*

³⁵ Eropi mua mera majagu õpa arĩ serẽpibocumi yure: “¿Dohpa ii sĩrinirã mura masa muriarãcuri? ¿Dohpa bejari dũpucurã masa muriarãcuri? arĩ serẽpibocumi yure.

³⁶ Eropa arĩ serẽpigũ pee masibigu ãhrimi. Oteriyere mari oterã iriye boacũ gohra puhri wiria. Boabiricũ ne puhri wirimasibea. Irire masia mua.

³⁷ Puhritaridigu yucuguguerere otebeaa mari. Dipayeri dihtare otea mari. Iriyeri trigo yeri arĩro ãhri, o gajiyeri arĩro arĩca. ³⁸ Iriyerire mari otera puhru Goãmuru igũ gamediro dopa ta iriyerire buga muriacũ iimi. Eropigu ojoducayerire ojoducaũ wacũ iimi igũ. Trigo yerire trigo sari wacũ iimi. Eropa ta puhridoremi Goãmũ. ³⁹ Arĩpehrerã dũpucuri yujuropa deyobea. Masa dũpuru yujuropa ta ãhraa. Waimurã dũpu sã gajiropa ta dehyoa. Mirimagũ porã dũpu sã gajiropa ta dehyoa. Eropirã wai sã gajiropa ta dũpucuma. ⁴⁰ Eropirã

umaro majarã sã ãhrima. Eropirã i yeba majarã sã ãhrima. Eropirã umaro majarã dupu gajiropa dehyoma. Eropiro i yeba majarã umaro majarã iro dopa árĩbeama. ⁴¹ Ōpa ta ãhraa. Abe umu majagu gosemi. Eropi ñami majagu sã boje ãhrimi ĩgu sã. Yuju diaye ta boyomi. Eropirã necã sã gajiropa bejari gosesirima. Necã majarã sãre mari ĩacũ gaji dipu daberogã gosesiriri dipu dehyoa. Eropiro gaji dipu turaro gosesiriri dipu dehyoa. ⁴² Eropa ta ãhrima sĩrinirã mura erã masa muriacũ. Masu ĩgu dupure mari yaara puhru ĩgu dupu boa waroca. Eropiro gaji dupu gajiropa árĩri dupu umuri nucũ ojocariburi dupu masa muriaroca. ⁴³ ĩgu dupure mari yaacũ sĩridigu dupu ñeri dupu ãhraa. Goãmu ĩgure masucũ ĩgu dupu ðatariari dupu árĩroca. Eropiro ĩgu dupu mari yaara dupu turari mariri dupu ãhraa. Eropiro Goãmu ĩgure ĩgu masucũ dupu turatariari dupu árĩroca. ⁴⁴ I yeba maja dupure mari yaarãca. ĩgu sĩridigu mura ĩgu masa muriacũ ĩgu dupu umaro maja dupu ta árĩroca. I yeba maja dupure mari opaa dohpaguere. Puhru umaro maja dupu sãre oparãca.

⁴⁵ Eropa ta arĩ werea Goãmu yare erã go-jarapũgue: "I yeba árĩmũhtadigu Adán waĩcũgu Goãmu ĩgure iicũ ojocarigu wañumi," arĩ go-jañuma. Adán iro dopa árĩgũpu ujutũyagũpu Cristopũ ojocaririre ogũ ãhrimi. ⁴⁶ I yeba maja dupu árĩmũhtara dupu ãhraa. Puhrugue umaro maja dupu árĩroca. ⁴⁷ Ōpa ta ãhraa: Árĩmũhtadigu Adánpu i yeba maja nicu mera

Goãmũ ãgu iira dũpũre dũpũcũñumi. ãgu pũhrũ aridigũpũ Cristopũ Ʃmaro majagũ árĩpũ. ⁴⁸ Nicu mera dũpũcũmũhtadigũ Adán árĩdiro dopa ta mari árĩpehrerã nicu mera iira dũpũcũrã ãhraa mari. Eropirã Ʃmarogue aridigũ Jesucristo ãgu árĩdiro dopa ta ãgu yarã árĩpehrerã ãgu iro dopa dũpũcũrãca mari. ⁴⁹ Mari Adán iro dopa ta dũpũcũrã árĩrã pũhrũ Cristo iro dopa dũpũcũrãca.

⁵⁰ Yũ acawererã, mũare ire werediaa: I yeba maja dũpũ di mera diro mera árĩri dũpũ Goãmũ ãgu opũ árĩroguere Ʃmaroguere ne wasome. Mari dũpũ boaburi dũpũ ãhraa. Eropiro Ʃmarogue Ʃmũri nũcũ mari árĩboroguere i dũpũ wasome. ⁵¹⁻⁵² Iribojeguere masa erã masibirirare dohpaguere mũare werediaa: Mari mera majarã yujurãyeri sĩrisome. Eropirã mata erã dũpũre gohrotorã árĩrãcoma. Corneta ãgu puriturinũ eropa ta waroca marire. Őpa waroca: Corneta busũra pũhrũ sĩrinirã mũrare Goãmũ masugũcumi Ʃmũri nũcũ erã árĩmorãre. Eropirã dũpũre gohrotonirã árĩrãca mari sã. ⁵³ Dohpaguere mari dũpũ boaburi dũpũ ãhraa. Eropigũ mari Goãmũ mera árĩniguicãburire mari dũpũre gohrotogũcumi Goãmũ. Eropigũ mari sĩriburi dũpũre gohrotogũcumi mari ne sĩribiriburi dũpũpũre. ⁵⁴ Mari dũpũre ne boabiriburi dũpũre gohrotogũcumi. Eropigũ marire sĩribiriburi dũpũre eropa árĩniguiburi dũpũre gohrotogũcumi. Iri eropa marire gohrotocũ iri bojegue Goãmũ yare gojarapũgue arĩ gojadiro dopa ta eropa waroca: Goãmũ sĩririñere cóãcãmi. ⁵⁵ Dohpaguere ne dipaturi

sĩrisome. Eropiro sĩririñe mera dipaturi mari ñero tarisome. ⁵⁶ Mari ñeri iira waja árĩcũ tamera sĩririñe mera ñero tarirāca. Eropiro Goãmũ doreri mari iimasibirira waja dipuwajacũa mari. Eropa dipuwajacũrã peamegue mari masa wamorã āhraa. ⁵⁷ Mari eropa árĩquerecũ ta mari Opũ Jesucristopũ marire peamegue wabiricũ iimi. Īgũ eropa iigũ árĩcũ masirã Goãmũ mera mucubiri “Ōhaa,” arãa mari.

⁵⁸ Eropirã yũ acawererã, yũ mahirã, Cristore mũa umupeorire duhubiricãque. Eropirã gajirã mũare õari buherire erã cóãdorecũ ne cóãbiricãque irire. Eropirã umũri nũcũ mari Opũ Jesucristo ĩgũ iidorerare õaro iiniguicãque mũa. Mari Opũ Jesucristo yare mari iicũ bu gohra ta ne árĩbeaa. Ire masirã ĩgũ iidorerire õaro iiniguicãque mũa.

16

Gajirãre Jesu yarãre Corinto majarã niyeru erã oburire werepũ Pablo

¹ Dohpaguere gajirãre Jesu yarãre mũa niyeru oburire weregũra mũare. Galacia yeba majarãre Jesu yarãre yũ dorediro dopa ta mũa sã iique. ² Semanari nũcũ soorinũ árĩcũ árĩpehrerã mũa Jesu yarãre gajirãre mũa oburi niyerure merogã gameneoque. Merogã oparã merogã oque. Eropirã wũañariro oparã wũañariro oque. Semanari nũcũ mũa eropa iique mũa pohrogue yũ ejacũ mũa obeoburi niyeru opayutuhaboro dopa. Eropigũ erogue ejagũ iripẽ niyeru wahasõ arĩripũre gojabasagũra. ³ Eropigũ

iripũre iri niyeru aĩgãmorãre mua beyenirãre ogura. Eropa otuhagu Jesu yarãre mua obeoburi niyerure aĩgãmorãre erãre obeogura Jerusalengue. ⁴ Iri macaguere yu iiburi árĩcũ yu sã waguca. Yu eropa wacũ yu mera ta erã sã warãcoma iri niyeru orã warã.

ĩgu erogue curiborore werepu Pablo

⁵ Macedonia yeba majarãre ãhatari wahgãguca yũhũ erãre. Tariagu mua pohro Corintogue ejaguca. ⁶ Erogue ejagu mua mera bajamenuri árĩboca yũhũ gajisubũ iigu. Yoañariri boje puhiró dihta mua mera árĩboca yũhũ. Eropirã gajipugue yu wacũ mua sã yure itamubeomasia. ⁷ Muare bajamenurigã ãdiabirica yũhũ. Eropigu Goãmũ gamecũ yoañariri boje mua mera árĩguca yũhũ. ⁸ Eropa árĩdiaqueregu ta pentecoste bosenu árĩcũgue Efeso árĩniguca dohpa. ⁹ Ohõ Efesogue dohpaguere mari Opũ Jesu yare peediarã bajarã ãhrima. Erã eropa árĩrã árĩcũ erãre werea. Yũhũ erãre eropa werecũ yure ãdiabirã bajarã ãhrima. Eropigu Efesogue árĩniguca dohpa.

¹⁰ Timoteo yu iro dopa ta mari Opũ yare iimi. Ĩgu eropa iigu árĩcũ mua pohrogue ĩgu ejacũ õaro mera ĩgure bocatĩri, ĩgu mera õaro mucubiriri mera árĩque mua. ¹¹ Eropirã ĩgure tarinũgabiricãque mua. Eropirã ĩgu muare goeriserecũ õaro mera ĩgure itamuque ĩgu yu pohrogue dujaricũ. Gajirã Jesu yarã mera guã ĩgure corerã iiaa. Eropirã õaro mera itamubeoque ĩgure.

¹² Apolo mari acaweregu Jesu yagu mware ïgu ïagu wacũ turaro gamerabu. Eropigu ïgure wadorerabu gajirã Jesu yarã mera ïgu waborore. Yu eropa wadorequerecũ ta ïgu dohpaguere wadiabeami. Eropigu pũhrũ ïgure iiri maricũ mwa pohrogue wagucumi ïgu daja.

Pablo ðadoretupũ

¹³ Õaro pee masiyurã árĩque mwa. Cristore umupeorã duhubiricãque. Õaro guñaturarã árĩque. Eropirã Goãmũ ya turari mera turarã árĩque mwa. ¹⁴ Árĩpehrerore iirã gajirãre mahiri mera irire iique.

¹⁵ ¿Estéfana ïgu ya wihi majarã mera guñari mwa? Erã Acaya yeba majarã ðari buherire peemũhtarã, iri yebare Cristore umupeomũhtanirã árĩma erãpũ. Eropirã gajirãre mari acawererãre Jesu yarãre erã ðaro itamuniguicãma. ¹⁶ Eropigu erã iro dopa árĩrãre, gajirãre Cristo yare itamurãre mwa ðaro yũhricũ gahmea yũhũ. ¹⁷ ïgu Estéfana, Fortunato, Acaico sã yũ pohrogue eratumama. Ohõ erã árĩcũ wũaro mucubiria yũhũ. Mwa maricũ mwa mera mucubirimasibiribu yũhũ. Eropigu erã eracũ mucubiria yũhũ. ¹⁸ Erã mera árĩgu ðaro siporãcũgu wahabu yũhũ. Mwa sãre eropa ta mucubiricũ iiañuma yũ pepicũ. Mwa pohrogue erã dipaturi wacũ daja erãre ðaro umupeoque mwa. Eropirã gajirãre erã iro dopa árĩrã sãre umupeoro gahmea mware.

¹⁹ Asia majarã Jesu yarã mware ðadorema. Eropirã Aquila, Priscila, erã ya wihi gamenererã

mera Cristo ĩĝu mahiri mera mware wware
õadorema. ²⁰ Õ majarã Jesu yarã árĩpehrerã
mware õadorema. Mwa mera majarãre bo-
catĩrirã õaro mera mojoto ñeaque.

²¹ Yuhu Pablo, yu basi i dihtare gojaa. Mware
õadorea.

²² Mari Opu Jesucristore gajigu ĩĝu mahibiricã,
Goãmu ĩĝure dipuwaja moaporo. Mari Opu duru
dujariporo.

²³ Mari Opu ĩĝu mahiri mera mware õadorea.

²⁴ Mware árĩpehrerãre burigã mahia Jesucristo
mera. Erop ta árĩporo. Iripêta ãhraa.

Goãmu Yare Wereripu

Desano: Goãmu Yare Wereripu New Testament

copyright © 2011 Wycliffe Bible Translators, Inc.

Language: Desano

Contributor: Wycliffe Bible Translators, Inc.

All rights reserved.

2020-11-17

PDF generated using Haiola and XeLaTeX on 21 Feb 2024 from source files dated 29 Jan 2022

17771afc-c309-57fd-9ff3-2d5a0cd59ff1